



Павелай Римэйхиндэ бэшэһэн хандалга

1 ¹⁻⁷ Бурханай хайра дурада хүртэһэн, тэрэнэй нангин арадын байхаар дуудуулагдаһан Рим хотын бүгэдэ зон, таанадта Иисус Христосой зараса, элшэнгээр хунгагдаһан Павел бэшэнэ. Манай Эсэгэ Бурхан ба Дээдын Эзэн Иисус Христос таанадта үршөөл хайра ба амгалан тайбаниие үршөөг лэ!

Бурхан Һайн Мэдээсэл номнохыемни намайе шэлэжэ абаа юм. Нангин Бэшэг соо хэлэгдэһэнэй ёһоор Бурхан тэрэ Һайн Мэдээсэлые урдань лүндэншэдөөрөө дамжуулан найдуулһан байгаа. Тэрэ Мэдээсэлые Бурханай Хүбүүн, манай Дээдын Эзэн Иисус Христос тухай. Иисус хүнэй бэе бээлхэдээ Давидай үри хадаһан боложо түрөө. Харин тэрэнэй хүр хүсэтэй Бурханай Хүбүүн байһыень, үхөөд амидырадань Нангин Һүлдэ харуулаа. Бүхы яһатаниие, тиихэдэ Иисус Христосой дуудаһан таанадые этигэл хүзэгтэй, мэдэлдэ оросотой болгохын тула Бурхан Хүбүүгээрээ дамжан, тэрэнэй аша тухада намайе элшэн болгон үршөөгөө юм.

⁸ Бүхы газар дэлхэйнхидэй танай этигэл хүзэг тухай дуулажа байһандань би Иисус Христосоор дамжуулан та бүхэнэй түлөө нэн түрүүн Бурханда баяр баясхалан хүргэнэб. ⁹⁻¹⁰ Зальбарха бүхэндөө таанад тухай дурдажа, таанадтай хээээшьеб уулзуулхыень гуйдаг байһыемни Бурхан мэдэхэ. Би Хүбүүн тухайнь Һайн Мэдээсэл номнон, үнэн зүрхэнһөө тэрээндэ алба хэнэ ха юмбиб. ¹¹ Би таанадтай уулзажа, Бурханай Һүлдын үршөөһэн аша буянгаар хубаалсахаяа аргагүй ехээр хүсэжэ байнаб. Тиигэбэл этигэл хүзэгтнай бэхижэхэ байгаа. ¹² Этигэл хүзэгөөрөө бидэ бэе бээе урмашуулха байгаалди.

¹³ Аха дүүнэр, таанадта ошохо гэжэ минии оло дахин тэмүүлдэг байһые мэдэжэ байха ёһотойт. Гэхэдэ, нэгэл юумэн намда ходо хаалта болодог байгаа. Бусад арадуудай дунда хүнүүдые Христосто

хандуулдагтайгаал адляар таанадайшые дунда үрэ дүнтэйгөөр ажал-лаха дуратай байгааб. ¹⁴⁻¹⁵ Хүнүүд хүмүүжүүлэгдэһэн гү, али хүмүүжүүлэгдээгүй гү, эрдэм ухаантай гү, али ном болбосоролгүй байна гү, илгаагүй юм. Би хүн бүхэндэ Һайн Мэдээсэлые номнохо ёһотой хүм. Тиимэл ушарһаа би Римдэ байһан таанадташые ошожо номнохые аргагүй ехээр хүсэжэ байнаб.

Һайн Мэдээсэлэй һүр хүсэн тухай

¹⁶ Һайн Мэдээсэл тухай номнохоёо би эшэнэгүйб. Ушарынь юуб гэхэдэ, тэрэ хүзэглэһэн хүн бүхэниие, нэн түрүүн еврейнүүдые, тиихэдэ баһал бусад арадуудые абарха Бурханай һүр хүсэн юм. ¹⁷ Гансал этигэл хүзэгэй ашаар хүнүүдые Бурханай үнэн сэдхэлтэн болгодогынь Һайн Мэдээсэл соо элээр харуулагдана. «Үнэн сэдхэлтэн этигэл хүзэгэйнгөөл ашаар ажаמידарха», – гэжэ Нангин Бэшэг соо бэшээтэй.

Хүн түрэлхитэн гэмтэй

¹⁸ Нүгэлтэ болон бузар муухай юумэнүүдые үйлэдэжэ, үнэн зүбые даража байһан хүнүүдтэ ехэ уур сүхалтай байһанаа Бурхан тэнгэриһээ харуулна. ¹⁹ Бурхан тухай мэдэжэ болохо бүхы юумэнүүдые тэдэ зон мэдэнэ, юундэб гэхэдэ, тэдэ зондо бултандань Бурхан өөрыгөө элирүүлэн харуулаа юм. ²⁰ Бурханай харагдадаггүй мүнхэ һүр хүсэн болон Бурханай мүн шанарынь газар дэлхэйн зохёон бүтээгдэхэһээ эхилэн тэрэнэй бүхы бүтээһэн юумэнүүдэй ашаар эли харуулагдана. Тиимэһээл үнөөхи зондо өөһэдыгөө хамгаалха юумэн байхагүй. ²¹ Тэдэнэр Бурханиие мэдэһэншые һаа, Бурханда алдар соло дуудаагүй, баяр баясхаланшые хүргөөгүй. Тэдэнэй һанал бодолынь удхагүй хооһон боложо, тэнэг зүрхэ сэдхэлынь харанхыда хушагдаба. ²² Тэдэнэр өөһэд тухайгаа ухаантай сэсэнбди гэнэ, үнэн дээрээ тэдэнэр үбэштэй тэнэгүүд юм. ²³ Тэдэнэр алдарта, мүнхэ Бурханда хүгэдэхын орондо мүнхэ амидаралгүй хүнүүдтэ гү, али шубуудта, амитадта, мүлхигшэдтэ адли онгонуудта шүтэнэ.

²⁴ Тиимэһээ Бурхан тэдэ зониие өөһэдынь замаар ябуулаа. Тэдэнэр хэхэ дуратай юумээе хээ, бузар муухай һанал бодолнуудынь эшэхээр юумэнүүдые хүүлэн, бэеыень бузарлуулжа байгаа. ²⁵ Тэдэнэр Бурхан тухай үнэн зүбые худал хуурмагаар һэлгээ, тиигээд хэтын хэтэдэ магтаал солотой байха Бүтээгшэ Бурханда шүтэхын орондо Бурханай бүтээһэн юумэнүүдтэ шүтэжэ байна.

²⁶ Тиигэхэдэнь өөһэдынгөө хүсэлэнгүүдые дахан ажамидархадань Бурхан тэдэндэ хаалта хээгүй. Тэдэнэй эхэнэрнүүдыншье дэлхэйн жама ёһоор хурисалда орохоёо болёод, юрэ бусын аргаар хурисалда ородог болобо. ²⁷ Эрэшүүлшье тон тиигэжэл ябадаг болоо. Тэдэнэр эхэнэрнүүдтэй унтахаяа болёод, эрэ хүнтэй унтахые аргагүй ехээр хүсэдэг болоо. Тиигэжэ эрэшүүл бэе бэетэйгээ эшэмээр юумэ худхана, тиигээд һүүлэй һүүлдэ буруу ябадалнуудайнгаа түлөө хэһээлтэдэ хүртэнэ. ²⁸ Тэдэ зоной Бурхан тухай бодожо байхаяа арсаһан хадань тэдэнэй тэнэг хоохон ухаан бодолойngoо хүсэлэнгөөр ябахадань Бурхан хаалта хээгүй. Тиимэһээл тэдэ зон хэхэ ёһогүй юумэнүүдые хэнэ. ²⁹ Тиимэһээл тэдэнэр нүгэл шэбэлдэ унаһан, зальхай забхай ябадалтай, алта мүнгэндэ шунаһан, хара ханаатай зон. Тэдэнэр атаархадаг, аладаг, хэрүүл ама гаргадаг, худалаар хэлэдэг, харата ааша гаргадаг, хүниие хардадаг, ³⁰ хоблодог, Бурханда дурагүй байдаг, хүниие доромжолдог, өөрөөрөө омогорхдог, һайрхадаг, муу муухай юумые ходо ханаашалжа байдаг, аба эжынгээ үгэ дууладаггүй юм. ³¹ Тэдэнэр тэнэг хоохон, хэлэһэн үгэдөө хүрэдэггүй, хүниие үршөөхэ, хайрлаха гэжэ мэдэдэггүй юм. ³² Тиимэ юумэ үйлэдэжэ байһан хүн бүхэн үхэлдэ хүртэхэ табилаантай гэжэ Бурханай хэлэһые мэдэжэ байһаншье хаа, тэдэнэр нүгэлтэ юумэ хэжэл байдаг, үшөө тиихэдэ бусад зоние тиимэ юумэ үйлэдүүлхэдэ түлхидэг юм.

Бурханай зарга шүүбэри

2 ¹ Заримантнай буруу юумэ хэжэ байһан зоние шүүбэрилдэг. Зүгөөр тиигэжэ байһандатнай таанадта ямаршье хүлисэл байхагүй. Бусад зоние зэмэлхэдээ, таанад өөһэдыгөө зэмэлнэт, ушарынь юуб гэхэдэ, таанад үнөөхил зонтойгоо адли буруу юумэ хэһэн гэмтэй болонот. ² Тиимэ мэтын юумэнүүдые үйлэдэжэ байһан хүнүүдые гэмнэн шүүбэрилжэ байһан Бурхан үнэн зүб юм гэжэ бидэ мэдэнэбди. ³ Гэмнэжэ байһан хүнүүдтэйгээл тон адли юумэ үйлэдэжэ байхадаа таанад Бурханай хэһээлтэдэ хүртэхэгүйбди гэжэ үнэхөөрөө һанана гүт? ⁴ Али таанад Бурханай агуухэ үршөөл хайра, хүлисэл, тэсэбэри тооногүй аалта? Таанадые өөртөө хандуулхын тула Бурхан танда үршөөл хайратай байна гэжэ мэдэнэгүй аалта? ⁵ Харин таанад зүрюүтэжэ, Бурханда хандахаяа арсанат. Тиигэжэ тэрэнэй уур сухалаа элирүүлхэ, газар дэлхэйнхидые гэмнэн шүүбэрилхэ үдэр хүрэтэр таанад өөһэдтөө бүрил муу хэһээлтэ бэлдэжэ

байнат. ⁶ Бурхан хүн бүхэниемнай хэһэн хэрэгүүдээрнь шиидхэхэ юм. ⁷ Һайн һайхан хэрэгүүдые бүтээжэ ябадаг, алдар соло, нэрэ түрэ, хүнэшэгүй ажаמידарал бэдэржэ байдаг зондо Бурхан мүнхын амидарал үршөөхэ. ⁸ Харин өөһэд тухайгаал бододог, үнэн зүбые буруушаадаг, тиихэдэ буруу хэрэг үйлэдэхэ дуратай зондо Бурхан уур сухалаа, хоро шараяа харуулха. ⁹ Харата бузар юумэ үйлэдэжэ байһан хүн бүхэндэ, нэн түрүүн еврей хүндэ, баһа ондоошые яһатанай хүндэ зоболон ба бэрхэшээл тудаха юм. ¹⁰ Харин һайн һайхан юумэ бүтээжэ байһан хүн бүхэндэ, нэн түрүүн еврей хүндэ, баһа ондоошые яһатанай хүндэ Бурхан алдар соло, нэрэ түрэ, амгалан байдал үршөөхэ юм. ¹¹ Бурхан яһа илгадаггүй юм!

¹² Бусад арадуудта Моисейн Хуули байгаагүй. Тэдэнэр Хуулигүйгөөр нүгэл шэбэл хээ, тиимэһээ Хуулигүйгөөр хосорхо. Еврейнүүд Хуулитай байгаа. Тэдэнэр Хуули доро нүгэл шэбэлээ хээ, тиин Хуулиин ёһоор гэмнүүлэн шүүлгэхэ юм. ¹³ Хуули юрэ шагнажа байһан хүнүүд бэшэ, харин тэрэниие сахижа байһан хүнүүд Бурханай урда үнэн сэдхэлтэй байха. ¹⁴ Бусад арадуудай зарим хүнүүд Хуулигүй байһаншые һаа, Хуулиин заабаринуудые зүнгөөрөө мэдэн сахижашые байдаг. Тиимэһээ тэдэнэр Хуулигүй байһаншые һаа, сэдхэл дотороо хуулитай байһанаа харуулна. ¹⁵ Тэдэнэр өөрынгөө үйлэ хэрэгүүдээр Хуулиин эрилтэнүүдэй зүрхэ сэдхэлдэнь бэшээтэй байһые харуулна. Тэдэнэй һэшхэлшые тэрэ ушар гэршэлнэ: заримдаа һанал бодолнуудынь тэдэниие зэмэлнэ, заримдаа хамгаална. ¹⁶ Тон энээндэл адляар номноһон Һайн Мэдээсэлэймни ёһоор тэрэ Үдэр Иисус Христосой ашаар бүхы хүнүүдэй нюуса һанал бодолнуудынь Бурхан гэмнэн шүүхэ юм.

Еврейнүүд болон Хуули

¹⁷ Заримантнай өөһэдыгөө еврейби гэжэ нэрлэнэ, Хуулида найдана, Бурханаар бахархана. ¹⁸ Өөһэдыгөө яжа абажа ябабалтнай Бурхан һайшаахаб гэжэ мэдэнэт, Хуули шудалан, үнэн зүбые илгадаг болобот. ¹⁹ Ёһор хүнүүдэй хүтэлэгшэдынь, харанхыда ябагшадай гэрэл туяань гээшэбди гэжэ өөһэд тухайгаа бата этигэлтэй байнат. ²⁰ Хуули соо эрдэм ухаанай ба үнэн зүйлэй байхада таанад тэнэг зондо заабарилха, залуушуулые һургаха аргатайбди гэжэ бодонот. ²¹ Бусадые һургадаг аад лэ, юундэ өөһэдөө һуранагүйбта? Хулгай хэжэ болохогүй гэжэ номножо байгаад, өөһэдөө хулгай хэнгүй байдаг аалта? ²² Гэрлэхэдээ нүхэртөө үнэн сэхэ байха хэрэгтэй гэжэ

хүнүүдтэ хэлээд, өөһэдөө үнэн сэхэ байдаг аалта? Таанад онго-нуудые үзэжэ яданат, үшөө тиихэдэ хүмэнүүдые тононот. ²³ Таанад Хуулитай байһандаа бахарханат, гэхэтэй сасуу Хуули сахингүй Бурханай нэрэ гутаанат. ²⁴ «Еврей таанадһаа боложо бусад арадууд Бурхание муудхана», – гэжэ Нангин Бэшэг соо хэлээтэй байдаг.

²⁵ Бэлгээ отолуулһан ушарта Хуули сахижа байбалтнай, тэрэ отолуулга танда аша тухатай юм. Хэрбээ Хуули сахидаггүй байбал, отолуулаагүй зонһоо таанад юугээрээшье дээрэ бэшэт. ²⁶ Хэрбээ отолуулаагүй хүнэй Хуулиин тогтоолнуудые сахижа байгаа хаа, Бурхан тэрэниие отолуулһантай адляар бодохо бэшэ аал? ²⁷ Тиимэһээ хэзээшье отолуулаагүй Хуули сахидаг хүн бүхэн еврейнүүдые гэмнэхэ бэшэ аал? Таанад отолуулһан байнат, Хуулитай байнат, гэхэдэ таанад тэрэ Хуули сахинагүйт. ²⁸ Гадна талаһаа еврейдэл адляар ажамидарһантнай, отолуулһан байдалтнай таанадые жэнхэни еврейнүүд болгоногүй. ²⁹ Жэнхэни еврей болбол гансал махабад бээ отолуулһан бэшэ, харин зүрхэ сэдхэлэйнгээ гүн соо отолуулһан байха ёһотой. Энэнь Хуулиин тогтоолнуудай бэшэ, харин Нангин Һулдын ажал юм. Тиимэ хүн уладай магтаалда бэшэ, харин Бурханай магтаалда хүртэхые хүсэдэг.

3 ¹ Еврей байхада юугээрээ хайн юм? Отолуулһан байхада ямар аша тухатай юм? ² Алишье талаһаа хайн, илангаяа еврейнүүдтэ Бурханай хургаалай даалгагданиинь шухала юм. ³ Үнэн дээрээ тэдэнэй зариманиинь тэрэ хургаалда этигээгүй. Тиин тэдэнэй этигэл хүзэггүй байхада Бурхан найдабариггүй байха аал? ⁴ Үгыл даа. Хүн бүхэнэй худал хуурмаг юумэ хэлэжэ байбашье, Бурхан үнэн зүбые хэлэдэг юм.

«Хэлэһэниини үнэн зүб байһыеш баталха,

Зарга шүүбэриин болоходо ши илажа гарахаш», – гэжэ

Нангин Бэшэг соо Бурхан тухай хэлэгдэнэ.

⁵ Хэрбээ Бурханай үнэн зүб байһые нүгэлтэ хэрэгүүднай элирүүлжэ байбал, бидэ юун гэжэ хэлэхэбибди? Уур сухалаа хүрөөд маанадые хэхээжэ байһан Бурхан буруу юумэ хэнэ аал? (Энэ оршолонгой зон тиигэжэ хурадаг юм). ⁶ Үгыл даа. Бурхан үнэн зүб бэшэ хаа, газар дэлхэйнхидые яажа шүүбэрилхэб?

⁷ «Хэрбээ манай буруу ябадал Бурханай үнэн сэхэ байһые харуулан, тэрээндэ агуухэ алдар соло олгожо байбалнь, юундэ Бурхан мүнөө болотор маанадые нүгэлтэн гэжэ нэрлэнэб», ⁸ үшөө «Нүгэлтэ

юумэ үйлэдэжэ байя, тиигэбэл тэрэмнай найн үрэ дүнтэй байха», – гэлдэнэбди гэжэ зарим зон маанадые зэмэлнэ. Зүгөөр Бурхан тэдэниие үнэн зүб зарга шүүбэридэ оруулха.

Хэншье үнэн сэдъхэлтэн гэжэ тоологдохогүй

⁹ Зай, хэлэһэн бүхы юумэмнай ямар удхатайб? Бидэ еврейнүүд бусад яһатанһаа дээрэ болоно гээшэ гүбди? Үгыл даа. Еврейнүүд бусад яһатанай зондол тон адляар нүгэл шэбэлдэ хүтэлүүлэгдэдэг юм гэжэ би хаяхан хэлээ һэнби. ¹⁰ Нангин Бэшэг соо иигэжэ хэлэгдэнэ:

- «Үнэн сэдъхэлтэй нэгэшье хүн үгы,
Бурханда найшаагдаха нэгэшье хүн үгы,
¹¹ Сэсэн ухаатай, Бурханиие бэдэрһэн
нэгэшье хүн үгы.
¹² Булта Бурханһаа хадуураа,
Булта хэндээшье хэрэггүй болоо.
Хэншье, нэгэшье хүн үнэн зүб юумэ хэнэгүй.
¹³ Тэдэнэй үгэнүүдынъ үхэлэй зам руу татадаг,
Хэлэнүүдынъ худал хуурмаг юумэ үгүүлхэдээ бэрхэ.
Үгэ бүхэниинь могойн хэлэндэ адли аюултай.
¹⁴ Тэдэ хорон үгэ, хараалһаа ондоо юумэ хэлэдэггүй.
¹⁵ Тэдэнэр гэмтээхэ, алахадаа түргэн юм.
¹⁶ Гэшхэһэн газартаал тэдэнэр һүйдхэл хүнэлгэ асардаг.
¹⁷ Тэдэнэр эб найрамдалда ажамидархые мэдэхэгүй юм.
¹⁸ Тэдэнэр Бурханһаашье айн һүрдэдэггүй юм».

¹⁹ Хүн түрэлхитэнэй өөрыгөө сагааруулхаяа болихын тула, бүхы газар дэлхэйнхидые Бурханай зарга шүүбэридэ оруулхын тула Хуули соо хэлэгдэһэн бүхы юумэнүүд Хуулиин мэдэлдэ байһан хүнүүдтэ хандуулаатай гэжэ бидэ мэдэнэбди. ²⁰ Юундэб гэхэдэ, Хуулиин тогтоолнуудые дүүргэжэ байһанаараа нэгэшье хүн Бурханда найшаагдахагүй. Хуули болбол маанадай нүгэлтэй байһые мэдэрүүлхэ зорилготой юм.

Бурханай урда үнэн сэдъхэлтэй байха тухай

²¹ Харин мүнөө Бурханай урда үнэн сэдъхэлтэй байха арга зам харуулагдаба. Тэрээн тухай Моисейн Хуулиин ба лүндэншэдэй гэршэлһэншье байбалнь, тэрэ арга зам Хуулида ямаршье хабаагүй юм. ²² Иисус Христосто хүзэглэһэн этигэл хүзэгэйнъ ашаар Бурхан

хүн бүхэниие, ямаршые илгаагүйгөөр, үнэн сэдхэлтэнэй тоондо оруулна. ²³ Ушарынь юуб гэхэдэ, хүн бүхэн нүгэл шэбэл хээд, Бурханай алдарта хүртэнэгүй. ²⁴ Зүгөөр маанадые сүлөөлхэн Иисус Христосой ашаар бидэ Бурханай аша буянда хүртэн, үнэн сэдхэлтэй болонобди. ²⁵⁻²⁶ Бурхан маанадтай эбтэй эетэй болохын тула Христосые тахил болгон эльгээгээ. Тиимэһээ бидэ тэрээндэ хүзэглэһэнэйнгөө ашаар Бурхантай эблэрнэбди. Бурхан урдань тэсэбэритэй, нүгэлтэнүүдые тоонгүй байһанаараа үнэн зүб байһанаа харуулба. Баһа Иисуста хүзэглэһэн зониие үнэн сэдхэлтэй гэжэ тоолоходоо Бурхан үнэн зүб байһанаа харуулна. ²⁷ Зай, тиихэдэе юугээрээ бахархамнайб? Юугээршые бахархалтагүй. Хуули сахиһанаараа үнэн сэдхэлтэнэй тоодо ороо гүбди? Үгыл даа. Этигэл хүзэгэйнгөө ашаар үнэн сэдхэлтэн болообди. ²⁸ Ушарынь юуб гэхэдэ, хүн Хуулин тогтоолнуудые дүүргэһэнээрээ бэшэ, харин этигэл хүзэгэйнгөө ашаар Бурханай урда үнэн сэдхэлтэй болодог гэжэ бидэ тоолонобди. ²⁹ Али Бурхан гансал еврейнүүдэй Бурхан болоно гү? Тэрэ баһал бусад арадуудай Бурхан бэшэ аал? Тиимэл даа, ³⁰ Бурхан ори ганса юм хадаа бүхы арадуудай Бурхан мүн. Тиин Бурхан бусад арадуудые еврейнүүдтэй тон адляар этигэл хүзэгэйн ашаар өөрынгөө урда үнэн сэдхэлтэй байлгадаг юм. ³¹ Тиихэдэе бидэ этигэл хүзэгөөрөө Хуули хүсэгүй болгоно гүбди? Үгыл даа, бидэ Хуули бүришые хүсэн түгэлдэр болгонобди.

Абраһам үльгэр жэшээ мүн

4 ¹ Зай, өөрынгөө үбгэ эсэгэ Абраһам тухай юун гэжэ хэлэхэбибди? ² Хэрбээ тэрэ хэһэн хэрэгүүдээрээ Бурханай урда үнэн сэдхэлтэн гэжэ тоологдобол, бахархаха юумэтэй байха. Гэхэтэй сасуу Абраһам тэрэ хэрэгүүдээрээ Бурханай урда хэзээшые бахархажа шадахагүй юм. ³ «Абраһамай Бурханда этигэһэн хадань Бурхан тэрэниие үнэн сэдхэлтэнэй тоондо оруулаа», – гэжэ Нангин Бэшэг соо хэлээтэй байдаг. ⁴ Хүдэлмэришэндэ түлэгдэһэн мүнгэн болбол бэлэг бэшэ юм. Тэрэ мүнгые хүн хүлһөөрөө олоно. ⁵ Хүнүүд хэһэн юумээрээ бэшэ, харин этигэл хүзэгөөрөө Бурханай урда үнэн сэдхэлтэн гэжэ тоологдохо юм. ⁶ Хэһэн хэрэгүүдтэйн холбонгүй хүниие үнэн сэдхэлтэн гэжэ Бурханай тоолоходонь, тиимэ хүниие Давид аза жаргалтай гэжэ нэрлэбэ.

⁷ *«Хара хэрэгүүдын хүлисэгдэһэн, нүгэл шэбэлнүүдын сагааруулагдаһан хүнүүд жаргалтай юм,*

⁸ *Дээдын Эзэнэй хэһэн нүгэлнүүдыень хүндэ тохоогүй хаа, тэрэ хүн жаргалтай юм».*

⁹ Үнөөхи Давидай хэлээшэ аза жаргал гансал отолуулһан зондо хабаатай аал? Үгыл даа. Тэрэнь отолуулаагүйшые зондо адлихан хабаатай юм. «Абраһамай Бурханда этигэһэн хадань Бурхан тэрэниие үнэн сэдхэлтэнэй тоодо оруулаа», – гэжэ Нангин Бэшэг соо хэлэгдэһые бидэ дурдаа һэмди. ¹⁰ Тэрэнь хэзээ ушарһан байгаа? Абраһамай отолуулһанһаа урда гү, али отолуулһан хойнонь гү? Отолуулһанһаань хойно бэшэ, харин отолуулһань урда тээ болоһон байгаа. ¹¹ Абраһам этигэл хүзэгэйнгөө түлөө үшөө отолуулһанһаа урда тээ үнэн сэдхэлтэнэй тоодо ороод, тэрэнээ баталан отолуулһан байгаа. Тиигэжэл Абраһам отолуулаагүй аад, Бурханда хүзэглэһэнэйнгөө ашаар үнэн сэдхэлтэн гэжэ тоологдоһон бүхы хүзэглэгшэдэй эсэгэнь болоо юм. ¹² Тэрэнэй отолуулһанһаа урда тээ Бурханда хүзэглэдэгтэйн адыар хүзэглэдэг отолуулһаншые хүн бүхэнэй эсэгэнь болоо юм.

Хүзэглэгшэдтэ Бурханай үгэһэн найдуулга

¹³ Бурхан Абраһамда, тэрэнэй үри һадаһадта газар дэлхэйе залгамжалан абахаш гэһэн найдуулга үгэһэн байгаа. Абраһамай Хуули сахижа байһан дээрэһэнь бэшэ, харин Бурханда хүзэглөөд, үнэн сэдхэлтэй болоһон хадань тэрэ найдуулга үгтэһэн байгаа. ¹⁴ Хэрбээ тэрэ найдуулһан Хуули сахиһанай түлөө үгтэһэн байбалнь, этигэл хүзэг юуншые бэшэ, найдуулга ямаршые үрэ дүнгүй байха хэн. ¹⁵ Хуули эбдэхэдэ Бурханай уур сухалынь хүрэдэг юм. Харин Хуулин үгы байбал, тэрэниие эбдэхын аргагүй юм.

¹⁶ Тиимэһээ найдуулга этигэл хүзэг дээрэ үндэһэлнэ, тиин Абраһамай бүхы үри һадаһадта, гансашые Хуули сахидаг бэшэ, харин Абраһамдал адыар хүзэглэһэн хүн бүхэндэ Бурханай агууехэ үршөөл хайраар тэрэ найдуулһань батаар үгтэбэ. Абраһам бултанаймнай эсэгэ. ¹⁷ Нангин Бэшэг соо: «Би шамайе олон арадуудай эсэгээр табяаб», – гэжэ хэлээтэй байдаг. Үхэһэн юумые амидыруулдаг, байхагүй юумые захиралтаараа бии болгодог Бурханда хүзэглэһэн Абраһам манай эсэгэ юм. ¹⁸ Найдаха шалтагаанайшые үгы байхада, Абраһам этигээ, найдаа, тиимэһээ «олон арадуудай эсэгэнь» болоо, Нангин Бэшэг соо хэлэгдэһэн ёһоор үри һадаһадын одо мүшэдтэл адли тоогүй олон байха. ¹⁹ Тэрэ үедэ Абраһам зуу хүрэхэ тооной байгаа, зүгөөр үхэхын наана болоһон махабад бэе тухайгаа, үри хүүгэдые

түрэхэ сагайнь үнгэрһэн Сарра тухайгаа бодоходоо, тэрэнэй этигэл хүзэгынь нулараагүй. ²⁰ Абраһам Бурханай найдуулгыг хэжэглээгүй, тэрэндэ бата этигэжэ байгаа, тиин этигэл хүзэгынь бүришые ехэ болоо. Тэрээгээрээ Абраһам Бурханиие алдаршуулаа. ²¹ Бурхан найдуулһан юумээ дүүргэхэ аргатай гэжэ Абраһам бата этигэлтэй байгаа. ²² Тиимэһээл Абраһам этигэл хүзэгэйнгөө ашаар «үнэн сэдхэлтэнэй тоодо оруулагдаһан байгаа». ²³ «Үнэн сэдхэлтэнэй тоодо оруулагдаа», — гэдэгынь гансал Абраһамда хабаатай бэшэ. ²⁴ Тэрэнь баһал манай Дээдын Эзэн Иисус Христосые амидыруулһан Бурханда хүзэглөөд, үнэн сэдхэлтэнэй тоодо ороһон маанадта хабаатай юм. ²⁵ Бурхан манай нүгэл шэбэлэй түлөө Иисусые үхэлдэ үгөөд, үнэн сэдхэлтэй байхымнай тула һүүлдэнь тэрэниие амидыруулаа юм.

Бурханай урда үнэн сэдхэлтэй байха тухай

5 ¹ Мүнөө бидэ этигэл хүзэгэйнгөө ашаар Бурханай урда үнэн сэдхэлтэй болообди, тиин манай Дээдын Эзэн Иисус Христосоор дамжан Бурхантай эбээ нэгэдхээбди. ² Христос баһа этигэл хүзэгэйнмнай ашаар маанадые мүнөө манай оршожо байһан Бурханай үршөөл хайрада хүтэлэн асараа. Тиимэһээ Бурханай алдарт хүртэхэбди гэжэ найдан, баяр жаргалтай байнабди. ³ Бидэ зобожо байһандаа баһа баяр жаргалтай байнабди, юундэб гэхэдэ, зоболон бэрхэшээлнүүд тэсэбэри тэнхээтэй болгодог, ⁴ харин тэсэбэри тэнхээтэй байхада Бурхан найшаадаг, тиихэдэ Бурханай найшаал найдабари түрүүлдэг, ⁵ тиимэһээ тэрэ найдабари маанадай урма хухалхагүй. Эдэ бүхы юумэнүүд Бурханай маанадта хайрлаһан Нангин Һүлдэһээ, тэрэнэй зүрхэ сэдхэлдэмнай бүрилдүүлдэг хайра дуранһаа эхитэй юм.

⁶ Христос Бурханай тогтооһон сагта манай түлөө маанадай ахир һула, нүгэл шэбэлтэй байхада үхөө гээшэ. ⁷ Үнэн сэдхэлтэнэй түлөө үхэхые хүн үнэндөө хүсэдэггүй, тиихэдэ эрхим хайн хүнэй түлөө үхэхые хэншыеб хүсэһэн байжа магадгүй. ⁸ Харин манай үшөө нүгэлтэй байхада Бурхан маанадай түлөө Христосые үхэлдэ хүртөөгөөд, манда аргагүй ехэ дуратай байһанаа баталаа.

⁹ Христосой адхарһан шуһанай ашаар бидэ мүнөө Бурханай урда үнэн сэдхэлтэй болоод, Бурханай хэһээлтэһээ заатагүй абарагдахабди. ¹⁰ Хэрбээ Бурханай дайсадын байхадамнайшые тэрэ өөрынгөө Хүбүүнэй үхэлөөр маанадтай эбээ нэгэдхэһэн байгаа хадаа,

мүнөө эбтэй эетэй байхадамнай, тэрэ Хүбүүнэйнгээ аминай ашаар маанадые хэһээлтэйгээ заабол абарха бэшэ аал. ¹¹ Бурханай маанадтай эб найрамдал тогтоохоор Дээдын Эзэн Иисус Христосые эльгээһэн ушарта бидэ аргагүй баяртай байнабди.

Адам Христос хоёр тухай

¹² Нүгэл нэгэ хүнөөр дамжан газар дэлхэйдэ буугаа, тиигээд тэрэ нүгэл үшөө үхэл дахуулан асараа. Тиимэхээ хүн бүхэнэй нүгэлтэй байһан хадань, хүн түрэлхитэнэй дунда үхэл тараһан байгаа. ¹³ Хуулиин үгтэхэһөөшье урда газар дэлхэй дээрэ нүгэл байгаа. Зүгөөр Хуулиин үгы байхада нүгэлшье тоогдодоггүй. ¹⁴ Адамай үе саһаа эхилээд, Моисейн үе саг хүрэтэр бүхы хүн түрэлхитэниие, тэдэнэй тоодо Бурханай захиралтые Адамай эбдэхэндэл адляар зүршөөгүй байһан хүнүүдыешье үхэл мэдэлдээ абаад байгаа.

Адам болбол һүүлдэнь ерэхэн Христосой анхан жэшээ байгаа. ¹⁵ Гэхэтэй сасуу Бурханай элбэг дэлбэгээр үршөөһэн бэлэгынь Адамай нүгэлтэй адли бэшэ. Тэрэ нүгэл бусад олон зондо үхэл асараа. Харин гансал Иисус Христосой олон зондо асарһан Бурханай буян хэшэгтэ бэлэг бүришье һүр жабхалантай байгаа. ¹⁶ Адамай нүгэлэй ба Бурханай бэлэгэй хоорондо тон ехэ илгаа байна. Үнөөхи нүгэл хэһээлтэдэ хүгэлжэ байгаа. Харин Бурханай үршөөл бэлэгынь олон нүгэл шэбэлнүүдыемнай хүлисүүлэн, маанадые үнэн зүб болгожо байна. ¹⁷ Ганса хүнэй нүгэлөөр дамжан, тэрэ ганса хүнһөө боложо, үхэл захиржа байһан юм. Гэхэтэй сасуу ганса хүнэй, Иисус Христосой бүтээһэн үрэ дүн бүришье агууехэ юм. Бурханай элбэг үршөөл бэлэгээр үнэн зүб болоһон хүн бүхэн Иисус Христосой ашаар ажамидаржа, захиржа байха. ¹⁸ Тиимэхээ нэгэ нүгэлэй бүхы хүнүүдые гэмнэн буруудхажа байхада, үнэн зүб нэгэ хэрэгэй ашаар хүн бүхэн үнэн сэдхэлтэй болоно, ами наһанда хүртэнэ. ¹⁹ Нэгэ хүнэй Бурханай мэдэлһээ гарахада яажа бүхы хүнүүд нүгэлтэнүүд болоо һэм, тон тиигэжэл нэгэ хүнэй Бурханай мэдэлдэ байһанай ашаар хүнүүд булта үнэн сэдхэлтэй болохо.

²⁰ Нүгэл шэбэлые элеэр харуулхын тула Хуули үгтэхэн байгаа. Зүгөөр нүгэл шэбэлэй ехэ элбэг байһан газарта Бурханай үршөөл хайрашье бүри элбэг дэлбэг үгтэжэ байгаа. ²¹ Хүн бүхэниие нүгэлэй хүтэлэн үхэлдэ хүргэдэг байһантайл тон адляар Бурханай үршөөл хайра маанадые хүтэлэн, үнэн сэдхэлтэй болгодог, манай Дээдын Эзэн Иисус Христосой ашаар мүнхын амидаралда хүргэдэг.

*Нүгэлэй эрхэ мэдэлхээ мултараад,
Христосой эрхэ мэдэлдэ байха тухай*

6 ¹ Зай, яахабибди? Бурханай үршөөл хайрын элбэгжэжэ байхын тула саашадаашье нүгэл шэбэл хэжэл байхамнай гээшэ гү? ² Үгыл даа. Нүгэлэй талаар үхөөд, эрхэ мэдэлхээнэ мултархан хадаа яажа саашадаашье нүгэл хэжэ ажамидархабибди? ³ Иисус Христостой нэгэдэн уһаар арюудхагдахадаа бидэ тэрэнэй үхэлыешье хубаалсан, тэрэнтэй нэгэдэһэн байгааби гэжэ мэдэнэгүй аалта? ⁴ Уһаар арюудхуулахадаа бидэ Христостой хамта үхөөд хүдөөлүүлэгдэһэн байгааби. Тиимэһээ Эсэгын алдарт аһа хүсэһэнэй Христосые амидыруулһандал адляар бидэһье ажамидаралай шэнэ зүргөөр ябахабди.

⁵ Хэрбээ бидэ Иисустай үхэлыень хубаалсан нэгэдэһэн байбал, тэрэнтэй хамта баһа амидыруулагдахаби. ⁶ Нүгэлтэ махабад бэемнай саашадаа маанадые нүгэлэй барлаг болгохогүйн тула урданаймнай байдал Христостой хамта хэрэһэн дээрэ хадагдан хүнэгдөө юм гэжэ бидэ мэдэнэбди. ⁷ Хүн үхэхэдөө нүгэлэй мэдэлхээ мултарна. ⁸ Христостой хамта үхэһэн хадаа бидэ тэрэнтэйл хамта амидархаби гэжэ этигэнэбди. ⁹ Ушарын юуб гэбэл, Христос үхөөд амидыруулагдаһан байгаа, тиигээд дахин үхэхгүй, юундэб гэбэл, үхэл тэрээн дээрэ ондоо ямарһье эрхэ засаггүй ха юм. ¹⁰ Христос нэгэл дахин манай нүгэлнүүдэй түлөө үхөөд, мүнөө Бурханай түлөө ажамидаржа байна. ¹¹ Тиимэһээ таанадые нүгэлэй талаар үхөөбди, харин Иисус Христосой үгэһэн амяар Бурханай түлөө ажамидарнаби гэжэ өөһэд тухайгаа бодохо ёһотойт.

¹² Махабад бэеынгээ хүсэлэнгүүдые дахаагүйн тула хүүртэ бээ нүгэлэй мэдэлдэ бү байлагты. Һүүлэй һүүлдэ махабад бэетнай хүнэн хосорхо, тиимэһээ тэрэнэй хүсэлэнгүүдые дахажа бү ябагты. ¹³ Махабад бэеынгээ алиһье эрхэтэниие нүгэлдэ хүтэлхэ хуурмаг ябадалай зэбсэг бү болгогты. Зүгөөр үхөөд амидырһан зондол адляар өөһэдыгөө Бурханда зорюулан, махабад бэеынгээ алиһье эрхэтэниие Бурханай хэрэглэхэ зүб ябадалай зэбсэг болгогты. ¹⁴ Нүгэл танай ажамидаралые захирха ёһогүй. Таанад Хууляар бэшэ, харин Бурханай үршөөл хайраар ажамидарна ха юмта.

¹⁵ Зай, тиигээд яахамнайб? Хуулиин доро бэшэ, харин Бурханай үршөөл хайра доро ябажа байгаа хадаа нүгэл шэбэлээ саашадаашье үйлэдэхэмнай гээшэ гү? Үгыл даа! ¹⁶ Хэнэй үгэ дууланат, тэрэнэйл

барлагын болонот гэжэ таанад мэдэнгүй аалта? Таанад нүгэлэй барлагын байбал, үхэлдэ хүртэхэт, али үгы наа, Бурханай үгөөр байдаг барлагын байбал, үнэн сэдхэлтэй болохот. ¹⁷ Бурханда баяр баясхалан хүргэе! Таанад нэгэ үедэ нүгэлэй барлагууд байһан аад, номногдоһон нургаалай үнэн зүбые бүхы зүрхэ сэдхэлээрээ дуулажа абаат. ¹⁸ Тиин нүгэлэй мэдэлһээ мултараад, таанад зүб юумэнэй барлагууд болобо гээшэт. ¹⁹ Таанадай үшөөл гүйсэд болбосороогүй хада би юрын жэшээнүүдые хэрэглэнэб. Урдань таанад бузар муухай юумэнүүдые үйлэдэхэ зорилготойгоор махабад бэеынгээ эрхэтэнүүдые нүгэлэй барлаг болгоһон байгаат. Харин мүнөө махабад бэеынгээ бүхы эрхэтэнүүдые нангин хэрэгүүдые бүтээжэ байхарнь зүб юумэнэй барлагууд болгогты.

²⁰ Нүгэлэй барлагууд байхадаа таанад зүб юумэндэ ямаршье хабагүй байгаат. ²¹ Урдань үйлэдэдэг хэрэгүүдһээ таанад юу оложо абабат? Мүнөө тэдэ хэрэгүүдһээ эшэжэ улайхаһаа бэшэ ондоо юумэн үгы, тэдэтнай таанадые үхэлдэ хүтэлжэ байгаа ха юм. ²² Мүнөө таанад нүгэл шэбэлһээ сүлөөлэгдөөд, Бурханай барлагууд болобот. Тэрэнэй үрэ дүндэнь таанад арюун гэгээн болобот, мүнхын амидаралда хүртэбэт. ²³ Хэһэн нүгэл шэбэлэйтнай түлөөһениинь үхэл юм. Харин манай Дээдын Эзэн Иисус Христостой нэгэдэн мүнхэ амидархань Бурханай үршөөл бэлэг юм.

Гэрлэлгэнээ жэшээ дурдая

7 ¹ Аха дүүнэрни, таанад Хуули ойлгонот, тиимэһээ Хуули гансал амиды хүнүүдые захиржа шадаха гэжэ мэдэнэт. ² Жэшээлбэл, хуулиин ёһоор хадамтай эхэнэр нүхэрэйнгөө амиды мэндэ байха үедэл нүхэртэйгөө холбоотой юм; хэрбээ нүхэрынгөө наһа барабалнь, тэрэ эхэнэр гэрлэлгын Хуулиһаа сүлөөтэй болоно. ³ Тиимэһээ нүхэрэйнгөө амиды мэндэ байха сагта ондоо хүнтэй ханилбалнь, тэрэ эхэнэр эрэдээ урбагша гэжэ нэрлэгдэхэ, харин нүхэрэйн нүгшэһэн байбал, тэрэ эхэнэр хуулиин ёһоор сүлөөтэй болоод, ондоо хүнтэй хугаашье наа, эрэдээ урбагша гэжэ тоологдохогүй. ⁴ Аха дүүнэрни, таанадай ушар тон тиимэл юм. Таанад мүнөө Христосой бэеын эрхэтэн болоод, Хуулитай холбоогоо таһалба гээшэт. Мүнөө таанад Бурханда алба хэжэ аша тухатай байхын тула үхөөд амидырһан Христосой хүнүүд болобот. ⁵ Энэ дэлхэйн жама ёһоор ажамидархадамнай Хуули махабад бэеымнай нүгэлтэ хүсэлэнгүүдые хэргээдэг байгаа, бидэ булта үхэхэ хойшолонтой байгаабди. ⁶ Харин

мүнөө бидэ урдань маанадые хүлээд байһан Хуулиин талаар үхөөд, эрхэ мэдэлһээнъ мултараабди. Саашадаа бидэ бэшэгдэһэн Хуули сахижа, хуушан аргаар алба хэхэгүйбди, харин шэнэ аргаар Һүлдын мэдэлдэ байгаад, Бурханда алба хэхэбди.

Хуули ба нүгэл тухай

⁷ Зай, тиигээд Хуули өөрөө нүгэлтэй гэжэ хэлэхэмнай гү? Үгыл даа! Зүгөөр Хуулиин үгы байбал, би нүгэл гээшэ юун бэ гэжэ мэдэхгүй байха һэнби. «Ондоо хүнэй юумэндэ бү һанаарха», – гэжэ Хуулиин хэлээгүй юм һаа, би тиигэжэ һанаархаха гээшэ нүгэл юм гэжэ мэдэхгүй һэм. ⁸ Зүгөөр нүгэл тэрэ захяа заабариин ашаар элдэб янзын харата хүсэлэнгүүдые зосоомни түрүүлээ. Нүгэл Хуулигүйгөөр ямаршые хүсэгүй. ⁹ Урдань Хуули мэдэхгүй байхадаа би амиды ябааб, теэд энэ захяа заабариие дуулахадаа, зосоомни нүгэл бүрилдэбэ, ¹⁰ тиигээд би хосорооб. Тиигэжэ амидарал асарха ёһотой байһан захяа заабари намда үхэл асараа. ¹¹ Боломжо гарахада, нүгэл энэ захяа заабаряар намайе мэхэлбэ, тиигээд алаба.

¹² Тиибэ яабашые Хуули өөрөө арюун нангин юм, захяа заабаринууднь баһа арюун нангин, үнэн зүб, һайн һайхан юм. ¹³ Зай, тиихэдээ һайн һайхан юумэн намда үхэл асараа гээшэ гү? Үгыл даа, нүгэл үхэлые асараа. Үнэн байдалаа элирүүлхын тула нүгэл һайн һайхан юумые хэрэглэн, зосоомни үхэл түрүүлээ. Тиимэһээ захяа заабариин ашаар нүгэлэй бүришые аймшагтай, бүришые бузар булай байһаниинь харуулагдаа юм.

¹⁴ Хуули оюун сэдхэлтэй холбоотой, харин би бэе махабадтаа хүлюулээд, нүгэлэй богоолынь болон худалдагдаһан байгаа гэжэ би мэдэнэб. ¹⁵ Би юу хэжэ байһанаашые ойлгоногүйб, юундэб гэхэдэ, би хэхэ дуратай юумээ хэнэгүйб, харин хэхэ дурагүй байһан юумээ үйлэдэжэ байнаб. ¹⁶ Хэхэ дурагүй юумээ хэжэ байхадаа би Хуулиин үнэн зүб байһые баталнаб. ¹⁷ Тиимэһээ үнэндөө болбол би бэшэ, харин зосоомни оршожо байһан нүгэл тиимэ юумэ үйлэдэнэ гээшэ. ¹⁸ Һайн һайхан юумэн зосоомни, махабад бэе соомни оршоногүй гэжэ би мэдэнэб. Һайн һайхан юумэ бүтээхэ хүсэлтэй байдагыше һаа, үнэндөө бүтээжэ шададаггүй хүм. ¹⁹ Хэхэ дуратай байһан һайн һайхан юумые хэнэгүйб, харин орондонь хэхэ дурагүй байһан харатай муухай юумые үйлэдэнэб. ²⁰ Хэрбээ хэхэ дурагүй байһан юумээ хэжэ байгаа юм хадаа би өөрөө тиимэ юумэ хэнэгүйб, харин зосоомни оршожо байһан нүгэл тиимэ юумэ үйлэдэнэ.

²¹Тиимэһээ һайн һайхан юумэ бүтээхэ дуратай байхадамни, харата һаналнууд намда һаалта болодог заншалтай. ²²Зүрхэ сэдьхэлдээ би Бурханай Хуули дэмжэжэ байна ха юмбиб. ²³Харин бэеымни эрхэтэнүүдые хүдэлгэдэг ёһон ухаан бодолоймни дэмжэдэг хуулита ёһонтой тулалдадаг юм. Бэе махабад соомни хүдэлдэг нүгэлэй ёһон намайе богоолшолоод байна. ²⁴Ямар азагүй хүн гээшэбиб! Үхэлдэ хүргэжэ байһан энэ махабад бэеһээмни хэн намайе аршалхань гээшэб? ²⁵Бурханда баяр баясхалан хүргэнэб, тэрэ манай Дээдын Эзэн Иисус Христосой ашаар аршалха юм.

Зай, иигээд би бэеэрээ нүгэлэй хуулида, харин ухаан бодолоороо Бурханай Хуулида алба хэжэ байгаа хүнби.

Бурханай Һүлдн хүсөөр ажамидарха тухай

8 ¹Иисус Христостой нэгэдэн ажамидаржа байһан хүнүүд мүнөө зэмэлэгдэхгүй. ²Ушарынь юуб гэбэл, Иисус Христостой хамта ажамидаруулжа байһан Һүлдн хуули намайе нүгэлэй ба үхэлэй хуулиһаа сүлөөлөө юм. ³Манай нүгэлтэ мүн шанарһаа боложо Хуулиин бүтээжэ шадаагүй юумые Бурхан бүтээбэ. Тэрэ Хүбүүгээ нүгэлтэ маанадтайл адли бээтэйгээр нүгэлнүүдэймнай түлөө тахил болгон эльгээжэ, махабад бэеэрнь манай нүгэлнүүдые гэмнэн шүүбэрилээ юм. ⁴Өөһэдынгөө хүсэлэнгүүдые дахангүй, харин Һүлдые дахан ажамидардаг маанад соо Хуулиин шаардаһан нангин зүйл бүтэхын тула Бурхан тиигээ. ⁵Нүгэлтэ шанарай хүсэлэнгүүдые дахан ажамидардаг хүнүүдэй ухаан бодолын нүгэлтэ шанарай хүсэлэнгүүдэй мэдэлдэ байдаг. Харин Һүлдн хэлэһэн ёһоор ажамидардаг хүнүүдэй ухаан бодолын Һүлдн эрхэ мэдэлээр болодог юм. ⁶Нүгэлтэ мүн шанарай мэдэлдэ байһань үхэлдэ хүргэдэг, харин Һүлдн мэдэлдэ байһань амидарал ба энхэ тайбан найруулдаг. ⁷Хүнүүд махабад бэеынгээ мэдэлдэ байхадаа Бурханай дайсадын байдаг, ушарын хэлэбэл, тэдэнэр Бурханай хуулиие сахинагүй, сахижа шадахашьегүй юм. ⁸Нүгэлтэ мүн шанарайнгаа хүсэлэнгөөр ажамидарһан хүнүүд Бурханда таатай байжа шадахагүй.

⁹Таанад нүгэлтэ мүн шанарайгаа хүсэлэнгүүдые даханагүйт, тиин зосоотнай Бурханай Һүлдн оршожо байхадань, Һүлдн эрхэ хүсэлөөр ажамидарнат. Зосоогоо Христосой Һүлдэгүй хүн тэрэнэй бэшэ юм. ¹⁰Хэрбээ зосоотнай Христосой оршожо байбал, нүгэл шэбэлһээ боложо бэе махабадайтнай хүнэхэдэ, Бурханай урда үнэн сэдьхэлтэй байһан ашаартнай хүнэһэ һүлдэтнай амиды байха. ¹¹Иисусые

үхэхэдэнь амидыруулхан Бурханай Һүлдын зосоотнай оршожо байхадань, Христосые Амидыруулагша зосоотнай оршожо байхан Һүлдөөрөө таанадайшые үхэлтэ бээдэ ами үршөөхэл.

¹² Тиимэһээл, аха дүүнэрни, бидэ нүгэлтэ мүн шанар байдалайнгаа хүсэлэнгүүдые дахан ажамидарха ёһогүйбди. ¹³ Тиигэжэ ажамидараа хадаа үхэхэт, харин Һүлдөөрөө нүгэлтэ хэрэгүүдээ хүнөөжэ байбал, амиды байхат. ¹⁴ Бурханай Һүлдөөр хүтэлүүлэгдэһэн хүнүүд Бурханай үхибүүдынь гээшэ. ¹⁵ Бурханай Һүлдэ таанадые тэрээнһээ айжа байдаг барлаг болгоогүй, харин Бурханай үхибүүдынь болгоо, тиин Һүлдын хүсөөр бидэ Бурхание: «Аба, Эсэгэмнай!» – гэжэ нэрлэдэгбди. ¹⁶ Бурханай Һүлдэ манай хүнэһэ хүлдэтэй ниилэн, маанадые Бурханай үхибүүд гэжэ батална. ¹⁷ Бидэ тэрэнэй үхибүүдынь хадаа өөрынгөө хүнүүдтэ хадагалажа байхан буян хэшэгэйнь залгамжалагшад гээшэбди, баһа Христосто бэлдээтэй юумые Христостой хамта залгамжалхабди. Христосой зоболонгуудые хубаалсаа юм хадаа, тэрэнэй алдарташые хүртэлсэхэ ха юмбиди.

Бурханай хүнүүдэй ерээдүй алдар тухай

¹⁸ Мүнөөнэй сагта зобожо байһамнай ерээдүйдэ маанадта үгтэхэ алдарай хажууда юуншые бэшэ гэжэ бодоноб. ¹⁹ Бүтээгдэһэн бүхы юумэнүүд Бурханай өөрынгөө үхибүүдые элирүүлэн харуулхыень аргагүй ехээр хүлээжэ байна. ²⁰ Бүтээгдэһэн бүхы юумэнүүд өөһэдэнь дура зоргоор бэшэ, харин Бурханай эрхэ хүсэлөөр зорилгоёо бээлүүлээгүй юм. ²¹ Тэдэ өөһэдөө үхэлтэ богоолшолгоһоо нэгэ сагта мултаржа, Бурханай үхибүүдэй хүр жабхаланта эрхэ сүлөө хубаалсаха юм гэжэ Бурхан түлэблэжэ байгаа ха. ²² Мүнөөнэйшые саг хүрэтэр бүтээгдэһэн бүхы юумэнүүд үхибүү түрэхэдөө үбдэжэ байхан эхэнэртэл адляар үбдэн ёолоно гэжэ бидэ мэдэнэбди. ²³ Гансашые бүтээгдэһэн бүхы юумэнүүд ёолоно бэшэ, харин Бурханай түрүүшын үршөөл бэлэгтэ, Һүлдэдэнь хүртэһэн бидэшые Бурханай маанадые үхибүүдынь болгохые, махабад бээемнай сүлөөлхые хүлээжэ байхадаа баһал зосоогоо ёолонобди. ²⁴ Ушарынь хэлэбэл, бидэ иимэ найдалтай болоод абарагдаһан байгаабди. Хэрбээ маанадай найдажа байһан юумэеэ хаража байбалнай, тэрэмнай бодото найдал бэшэ байха һэн. Хаража байһан юумэндээ яажа найдалтайб? ²⁵ Харин хараагүй юумэндээ найдажа байхадаа бидэ ехэл тэсэбэритэйгээр хүлээжэ байдагбди.

²⁶ Маанадай шадал тэнхээгүй байхада маанадта Һүлдэ туһалдаг. Яажа зальбарха хэрэгтэйб гэжэ мэдэхгүй байхадамнай Һүлдэ тайлбарилхын аргагүй ёолоогоор манай түлөө зальбардаг. ²⁷ Харин зүрхэ сэдхэлыемнай соо харадаг Бурхан Һүлдын һанал бодолые мэдэжэ байдаг юм. Һүлдэ Бурханай эрхэ хүсэлөөр лэ тэрэнэй арадай түлөө тэрээниие гуйна ха юм.

²⁸ Бурханда дуратай, тэрэнэй эрхэ хүсэлөөр дуудуулагдаһан хүнүүдэй бүхы юумэнүүдтэнь Бурхан урагшатай байдаг. ²⁹ Бурханай шэлэжэ абаһан хүнүүд Хүбүүндэнь адли байха табилаантай, тиин Хүбүүниинь олон хүзэглэгшэ аха дүүнэрэй дунда ууган Хүбүүниинь байха юм. ³⁰ Бурхан шэлэжэ абаһан хүнүүдээ дуудаа, дуудаһан хүнүүдээ үнэн сэдхэлтэй болгоо, үнэн сэдхэлтэнгүүдые алдар солодоо хүртөөгөө.

Бурханай хайра дуран

³¹ Эдэ бүхэн тухай бидэ юун гэжэ хэлэхэбибди? Хэрбээ Бурханай манай талада байбал, маанадта эсэргүүсэһэн хүн байха аал? ³² Бурхан өөрынгөө Хүбүүниие хайрлангүй, бидэнэй бултанаймнай түлөө үргэһэн байгаа. Бурхан маанадта Хүбүүгээ үгэжэ байбал, бусадшые бүхы юумэнүүдээ элбэгээр үгэхэ бэшэ гү? ³³ Бурханай шэлэжэ абаһан хүнүүдые хэн гэмнэхэб? Бурхан өөрөө тэдэниие зэмэгүй гээ ха юм. ³⁴ Тиихэдээ хэн тэдэниие зэмэлхэб? Үхөөд, тиигээд амидыраад, Бурханай баруун гарынь болоһон, маанадай түлөө гуйлта үргэжэ байһан Христос Иисус тэдэниие гэмнэхэгүйл! ³⁵ Тиихэдээ юун бидэниие Христосой хайра дураһаа холодуулхаб? Зоболонгууд гү, али бэрхэшээлнүүд гү, али хашалга мүрдэлгэнүүд гү, али үлбэр үлэсхэлэн байдал гү, али ядуу тулюур байдал гү, али аюул оһол гү, али үхэл холодуулха болоно гү?

³⁶ *«Шинии түлөө бидэ үдэр бүхэн үхэлэй аюултай тохёолдонобди.*

Гаргуулхаяа байһан хониндол адли байнабди», –

гэжэ Нангин Бэшэг соо хэлэгдэнэ. ³⁷ Эдэ бүхы ушарнуудта бидэ маанадта дуратай байһан Христосой ашаар илалта туйлан гаранабди. ³⁸ Амиды байна гүбди, али үхэхэн байна гүбди, юуншые бидэниие Бурханай хайра дуранһаа хаһаахагүйл. Эльгээмэлнүүдшые, бусад огторгойн хүсэнүүдшые, оршон үеын юумэнүүдшые, ерээдүй сагай юумэнүүдшые, ³⁹ дээдын хүсэнүүдшые, доодын хүсэнүүдшые, бүтээгдэхэн бүхы юумэнүүдшые манай Дээдын Эзэн Христос Иисус соо оршоһон Бурханай хайра дуранһаа маанадые холодуулжа шадахагүй гэхэн бата этигэлтэй байнаб.

Бурхан болон тэрэнэй арад

9 ¹ Христосто хүзэглэдэг би үнэн зүбые хэлэнэб, худалаар хэлэнэ-гүйб. Тиин Нангин Һүлдэшье, һэшхэлнишье минии хэлэһые үнэн гэжэ гэршэлнэ. ² Би угаа ехээр уйдана гашууданаб, зүрхэ сэдьхэлни зогсонгүй үбдэнэ. ³ Өөрынгөө арадые абархын түлөө Бурханай хараалда хүртөөд, Христосхоо холодуулхадашье би бэлэнби. ⁴ Тэдэ израильшууд Бурханай шэлэжэ абанан хүнүүд юм. Бурхан тэдэндэ алдараа харуулаа, тэдэнтэй хэлсээ баталаа, тэдэндэ Хуули, тиигээд шүтэлгын Һүмэ ба найдуулгаа үгөө. ⁵ Тэдэнэр агууехэ үбгэ эсэгэнэртэй юм, тиихэдэ Бурханай табисуурта махабад бэеэрэе баһал тэдэнэй яһанай хүн юм. Бүхы юумые захиржа байһан Бурхан хэтын хэтэдэ магтаал солотой байһай гэжэ би зальбарнаб! Болтогой!

⁶ Бурхан амалһан юумэеэ дүүргээгүй гэжэ хэлэхын аргагүй. Һүүлэй Һүүлдэ Израилиин арад зон бултадаа Бурханай бодото хүнүүд бэшэ. ⁷ Тиин Абраһамай үри һадаһад бултадаа Бурханай үхибүүд бэшэ. «Ши Исаагаар лэ дамжан минии амалһан үри һадаһадтай болохош», – гэжэ Бурхан Абраһамда хэлэһэн байгаа. ⁸ Ондоогоор хэлэбэл, юрын аргаар түрэхэн үхибүүд* Бурханай үхибүүд бэшэ. Бурханай найдуулһанай ёһоор лэ түрэхэн үхибүүд бодото үри һадаһад гэжэ тоологдодог гээшэ. ⁹ «Хойто жэл энэл сагтаа би дахин ерэхэб, тиин Саррашни хүбүүтэй болоод байха», – гэжэ хэлэһэниинь Бурханай найдуулһан үгэ байһан юм.

¹⁰ Энээнһээ гадна Ребекка ба манай үбгэ эсэгэ Исаагай хоёр хүбүүтэй болоходо тиимэ юмэн баһа тохёолдоо һэн. ¹¹⁻¹² Үшөө тэдэ хоёрой түрөөгүй, һайн гү, али муу юумэ хээгүй байхадань, «Ехэ хүбүүншни дүүдээ алба хэжэ байха», – гээд Дээдын Эзэн Ребеккэдэ хэлэһэн байгаа. Тиигэжэ хэлэхэдэ Дээдын Эзэн хүнүүдэй хэрэгүүдээр бэшэ, харин өөрынгөө эрхэ хүсэлөөр шэлэжэ байһанаа харуулһан байгаа. ¹³ «Яковта би дуратай, харин Исаавта дурагүй байгаа», – гэжэ Нангин Бэшэг соо хэлээтэй байдаг.

¹⁴ Зай, тиихэдээ Бурхан үнэн зүб бэшэ гэжэ хэлэхэмнай гээшэ гү? Үгыл даа! ¹⁵ Тэрэ Моисейдэ: «Дуратайл хүнөө би үршөөхэб, дуратайл хүнөө би хайрлахаб», – гэжэ хэлэһэн байгаа. ¹⁶ Тиимэһээ бүхы юмэн бидэ хүнэй хүсэхэнһөө гү, али хэнэнһээ бэшэ, харин

* Эндэ Абраһам ба Агари гэдэг барлаг эхэнэр хоёрһоо түрэхэн Измаил хүбүүнэй үри һадаһад тухай хэлэгдэнэ.

Бурханайл үршөөһэнһөө дулдыдана. ¹⁷ «Шамаар дамжан һүр жабхалангаа харуулхын тула, бүхы газар дэлхэйн зоной магтаал солодо хүртэхын тула би шамайе хаанаар табяа хүм», – гэжэ Дээдын Эзэн Египедэй фараондо Нангин Бэшэг соо хэлэнэ. ¹⁸ Тиимэхээ Бурхан дуратайл хүнөө үршөөнэ, дуратайл хүнөө зүрюу болгоно.

¹⁹ «Тиигэбэл Бурхан яахадаа хүниие зэмэлнэб? Бурханай эрхэ хүсэлдэ хэн эсэргүүсэхэ аргатайб?» – гэжэ хэн нэгэн намһаа һураха. ²⁰ Ай, нүхэр, Бурханда үсэрхэжэ байхаар ши хэн гээшэбши? Бүтээлын тэрэниие бүтээгшэдэ: «Юундэ намайе иигэжэ бүтээгээбши?» – гэжэ хэлэхэ аал? ²¹ Домбонуудые бүтээдэг хүн нэгэл адли шабарһаа тусгай хэрэглэлэй домбо ба үдэр бүхэн хэрэглэгдэдэг юрын домбо бүтээхэ эрхэтэй бэшэ аал?

²² Бурхан уур сухалаа харуулха, һүр жабхалангаа элирүүлхэ һанаатай байгаа, гэхэдэ, хосорхо заяатай байһан хүнүүдтэ тэрэ ехэл тэсэбэригэйгээр хандана. ²³ Бурхан алдартаа хүртөөхэ гэжэ бэлдээд байһан үршөөлтэ хүнүүдтэ баһал элбэг дэлбэг алдараа элирүүлхэ дуратай байна. ²⁴ Бидэ гансал еврейнүүдэй дундаһаа бэшэ, харин бусадшые арадуудай дундаһаа шэлэгдэжэ абтаһан хүнүүд гээшэбди. ²⁵ Тон тиигэжэл Дээдын Эзэн Осиин ном соо хэлэнэ: «Минии арад бэшэшые байгаа һаань,

Би тэдэниие өөрынгөө арад болгохоб.

Дурагүй байһан яһатандаа

Би хайра дуратай болохоб».

²⁶ «Таанад минии арад бэшэт гэжэ хэлэгдэһэн эгээл тэрэ һууринда тэдэнэр

Амиды Бурханай үхибүүд гэжэ нэрлүүлхэ».

²⁷⁻²⁸ «Дээдын Эзэн зарга шүүбэрэе газар дэлхэй дээрэ шуумгайгаар ябуулха. Тиимэхээ Израилиин арад зоной далайн элһэндэл адли тоогүй олон байгаашые һаань, тэдэнэй үсөөниинь абарагдаха», – гэжэ Израилиин арад зон тухай Исаяя лүндэншэн айладхаа юм.

²⁹ «Хэрбээ һүр хүсэтэй Дээдын Эзэн зарим үри һадаһадые маанадта үлөөгөөгүй юм болбол, бидэ Содомдол адли хүнөөгдэхэ, Гоморродол адли усадхагдаха байгаабди», – гэжэ баһал Исаяя лүндэншэн уридшалан хэлэнэ.

Израиль болон Гайн Мэдээсэл

³⁰ Зай, юун гэжэ хэлэхэбиди? Бурханай урда үнэн сэдхэлтэй байхые оролдоогүй бусад арадууд этигэл хүзэгэйнгөө ашаар үнэн сэдхэлтэй болоо. ³¹ Харин Хуули сахин үнэн сэдхэлтэй болохые

зорихон Израилиин арад зон үнэн сэдхэлтэй болоогүй. ³² Юундэ болоогүйб? Юуб гэбэл, тэдэнэр этигэл хүзэгтөө бэшэ, харин хэрэгүүдтээ найдаһан байгаа. Тиимэһээ «бүдэрдэг шулуунда» тэдэнэр бүдэрһэн байгаа. ³³ Бурхан Нангин Бэшэг соо тон тиигэжэ хэлэнэ: «Хара даа! Би Сион дээрэ хүнүүдэй бүдэрдэг, хүнүүдые гомдохоодог шулуу табинаб. Харин тэрээндэ этигэл хүзэгтэй хүнүүд хэзээдэшье урмаа хухархагүй».

10 ¹ Аха дүүнэр! Израилиин арад зоной абарагдахые би бүхы зүрхэ сэдхэлээрээ хүсэнэб, тэрээн тухай Бурханда зальбарнаб. ² Тэдэнэр Бурханда хүгэдэдэг гэжэ гэршэлнэб, гэхэтэй сасуу тэдэнэй хайра дуран үнэн зүб мэдэрэл дээрэ оршоногүй. ³ Тэдэнэр Бурханай урда яажа үнэн сэдхэлтэй байхые мэдэнгүй, өөһэдынхээрээ болоод, Бурханай мэдэлһээнь гаран, үнэн сэдхэлтэй болгодог Бурханай замһаа хадуурна. ⁴ Ушарынь хэлэбэл, хүзэглэһэн хүн бүхэнэй үнэн сэдхэлтэй болохын тула Христос Хуулиин зорилго бээлүүлнэ.

Хүзэглэгшэдэй абарагдаха тухай

⁵ Хуули сахин үнэн сэдхэлтэй болохо тухай: «Хуулиин захяа заабаринуудые сахихан хүн бүхэн амиды байха», – гэжэ Моисей бэшээ. ⁶ Харин этигэл хүзэгэйнгөө ашаар үнэн сэдхэлтэн гэжэ тоологдодог зондо хэлэгдэнэ: «Христосые өөһэдтөө доошонь буулгахаяа тэнгэри өөдэ гараһанай хэрэггүй». ⁷ Али «Христосые үхэлһөө бодхоохын тула үхэлэй доодо орондо бууһанай хэрэггүй».

⁸ Юундэб гэбэл, «Бурханай мэдээсэл хажуудашни байна, хэлэ амандашни, зүрхэ сэдхэлдэшни байна». Эгээл тэрэ мэдээсэлые бидэ таанадта номнонобди. ⁹ Хэрбээ Иисусые Дээдын Эзэн гэжэ айладхаад, Бурхан тэрэниие амидыруулаа гэжэ зүрхэ сэдхэлээрээ этигэжэ байбал, ши абарагдахаш. ¹⁰ Зүрхэ сэдхэлээрээ хүзэглэһэнэйнгөө ашаар бидэ үнэн сэдхэлтэн болонобди, хэлэ амаараа айладхан абарагданабди. ¹¹ «Тэрээндэ хүзэглэһэн хүн бүхэн урмаа хухархагүй», – гэжэ Нангин Бэшэг соо хэлэгдэнэ. ¹² Еврей хүн гү, али ондоо яһанай хүн гү, ямаршые илгаагүй юм. Дээдын Эзэн хүн бүхэндэ ориганса юм, тиин тэрээндэ хандаһан хүн бүхэниие тэрэ элбэг дэлбэгээр үршөөлдөө хүртөөдэг. ¹³ «Дээдын Эзэниие дуудаһан хүн бүхэн абарагдаха», – гэжэ Нангин Бэшэг соо хэлээтэй байдаг ха юм.

¹⁴ Тиигээд хүзэглөөгүй байһан хүнөө яажа гуйн дуудалтайб? Тиихэдэ тэрээн тухай дуулаагүй аад, яажа хүзэглэлтэйб? Тиихэдэ хүнэй

номноогүй ушарта яжа мэдээсэлые дуулалтайб? ¹⁵ Тиихэдэ номногшодые ябуулаагүй хаа, яжа мэдээсэлые номнолтойб? «Һайн Мэдээсэл асаржа байһан номногшодой ерэхые харахада үзэсхэлэнтэ гоё юм», – гэжэ Нангин Бэшэг соо хэлэгдэнэ. ¹⁶ Гэхэтэй сасуу Һайн Мэдээсэлдэ булта этигээгүй юм. «Дээдын Эзэн, хэн манай мэдээсэлдэ этигээб?» – гэжэ Исаяя лүндэншэн хэлэнэ. ¹⁷ Тиимэхээ этигэл хүзэгтэй болохын тула хүн мэдээсэл дуулаха ёһотой, тиин мэдээсэлэй үгтэхын тула Христос тухай номногдохо ёһотой.

¹⁸ Израилиин арад зон мэдээсэл дуулаагүй аал гэжэ би асуужа байнаб. Юундэ дуулаагүй байха юм,

*«Тэдэнэй дуун бүхы газар дэлхэйгээр тараа,
тэдэнэй үгэнүүдын газар дэлхэйн заха хизаар хүрөө», – гэжэ
Нангин Бэшэг соо хэлэгдэнэ ха юм.*

¹⁹ Израилиин арад зон ойлгоо гү, али үгы гү гэжэ би дахин асуунаб. Моисей өөрөө энээндэ Дээдын Эзэнэй нэрһээ харюу үгөө юм:

*«Юуныше бэшэ яһатанаар
би арад зонойнгоо атаархал түрүүлхэб,
юуныше ойлгодоггүй хүнүүдээр
би арад зонойнгоо уур сухалын хүргэхэб».*

²⁰ «Намайе бэдэрээгүй хүнүүд намайе олоо.

*Нам тухай асуужа байгаагүй хүнүүдтэ
би өөрыгөө нээгээб», – гэжэ Исаяныше Бурханай нэрһээ зоригтой
хатуугаар айладхана.*

²¹ «Үгэ дууладаггүй, үһэрхүү зүрюу арадта Дээдын Эзэн бүхэли үдэртөө гараа һарбайжа байгаа», – гэжэ Исаяя Израилиин арад тухай хэлэнэ.

Израильда үгтэһэн Бурханай үршөөл хайра тухай

11 ¹ Зай, тиихэдээ Бурхан өөрынгөө арадһаа арсаба гээшэ гү гэжэ би һуранаб. Үгыл даа! Би өөрөөшые Израилиин хүн, Абраһамай үри һадаһан, Вениаминай обогой хүн гээшэб. ² Эхинһээ нааша шэлэжэ абаһан арадһаа Бурхан арсаагүй. Нангин Бэшэг соо Израилиин арадые зэмэлэн Илиягай Бурханда хандаһые һананагүй аалта? ³ Тэрэ: «Дээдын Эзэн, тэдэнэр шинии лүндэншэдые алаа, үргэлэй газарнуудыешни һандаргаа, би гансаараал үлөөд байнаб, тиин тэдэнэр намайешые алаха гэжэ забдана», – гээ һэн. ⁴ Бурхан харюудань юун гэжэ хэлээ һэм? «Хуурмаг бурхан Ваалда мүргөөгүй долоон мянган хүнүүдые би өөртөө үлөөгөөб». ⁵ Мүнөөнэйшые сагта

тон тиимэ: Бурханай үршөөл хайраар шэлэгдэжэ абтаһан хүнүүд үшөөл бии юм. ⁶Тэрэ хүнүүдые хэһэн хэрэгүүдээрнь бэшэ, харин үршөөл хайраараа шэлэжэ абадаг юм. Тиигээгүй болбол тэрэнэй үршөөл хайра бодото бэшэ байха һэн.

⁷Зай юун болоноб? Израилиин арад зон бэдэрһэн юумээ олоогүй. Зүгөөр үсөөхэн лэ Бурханай шэлэжэ абаһан хүнүүд бэдэрээшээ олоо юм, харин бусад зонинь Бурханай уряалые анхараагүй юм. ⁸Нангин Бэшэг соо хэлэһэнэй ёһоор: «Бурхан тэдэнэй сэдхэлые мэдэрэлгүй болгоо, тиин тэдэнэр мүнөөдэршые болотор хараха гү, али дуулаха аргагүй байна».

⁹ *«Найр баярай шэрээдэ нуухадаа
тэдэнэр зангада орог,
бүдэржэ унаг, хэһээлтэдэ орог!*

¹⁰ *Хаража шадахагүй байхаар
Тэдэ һохорог лэ!*

*Бэрхэшээл зоболонгуудта дарагдан
хэтын хэтэдэ тахииг лэ!» – гэжэ Давид бэшэнэ.*

¹¹Тиигэбэл еврейнүүд дахин хэзээшые һэргэжэ бодохогүйгөөр бүдэржэ унаа гү гэжэ би нуранаб. Үгыл даа! Тэдэнэй нүгэл шэбэлдэ унахада, атаархалынь хүргэжэ байхаар бусад арадууд абаралда хүртөө. ¹²Еврейнүүдэй нүгэлһөө боложо газар дэлхэйнхид элбэг дэлбэгээр буян хэшэгтэ хүртөө, тэдэнэй оюун сэдхэлэй ядуу байһанһаа бусад арадууд баян бардамаар буян хэшэгтэ хүртөө. Тиихэдэ еврейнүүдэй Бурханда хандабалнь, буян хэшэг бүришые элбэг дэлбэгээр үгтэхэ бэшэ аал.

Бусад арадуудай абарагдаха тухай

¹³Бусад арадууд, мүнөө би таанадта ханданаб. Бусад арадуудай элшэнээр ажаллажа байһандаа би бахаржажа байхаб. ¹⁴Тиигэжэ өөрынгөө яһанай аха дүүнэрэй дунда атаархал түрүүлжэ, заримыеньшые абаржа магадгүйб. ¹⁵Тэдэнһээ арсахадаа, Бурхан бусад арадуудтай эбгүй байһанаа эбтэй зетэй болоо. Харин Бурханай еврейнүүдые ойртуулбалнь, юун болохоб? Тиигэбэл үхэһэн хүнүүдэй амидырһантай адли байха!

¹⁶Хэрбээ дээжынь Бурханда зорюулаатай байбал, үлэһэнииньшые арюун сэбэр байхал. Хэрбээ модоной үндэһэниинь Бурханда зорюулаатай байбал, эшэ халаануудыншые баһа арюун сэбэр байха юм.

¹⁷Нуулгагдаһан модоной зарим халаануудыень таһалаад, орондонь

зэрлиг оливай халаануудыг хуурижуулба ха. Бусад арадуудай түлөөлэгшэ таанад эгээл тэрэ зэрлиг оливай модотой адлит, мүнөө таанад үндэхэндэ, шэмэ шүүхэндэ баһа хабаатай болобот. ¹⁸ Тиимэхээ таанад үнөөхи халаануудта адляар таһалагдажа хаягдаһан хүнүүдыг доогуур бү харагты. Яахадаа таанад хамараа дээгүүр үргэбэбта? Таанад миин лэ халаанууд ха юмта, таанад үндэхэ тэнжүүлэн баринагүйт, харин үндэхэн таанадыг тэнжүүлэн барина.

¹⁹ «Минии хуурижаһын лэ тула халаанууд таһалагдаһан байгаа», — гээд таанад хэлэхэт. ²⁰ Тэрэшни зүб. Тэдэнэр этигэл хүзэггүй байһан хадаа таһаржа унаа, харин таанад этигэл хүзэгөөрөөл тэрэ хууринда баригдажа байнат. Тиимэхээ тэрээгүүрээ бү бахархагты, зүгөөр айжа хүрдэжэ байгты. ²¹ Бурхан жэнхэни халаанууд болохо еврейнүүдыг хайрлаагүй, тиихэдэ тэрээндэ үхэрхэбэлтнай, тэрэ таанадыг бүришье хайрлахагүй. ²² Бурхан ямар үршөөл хайратай, ямар уур сухалтай байдаг бэ гэжэ таанад эндэхээ харабат. Бурхан өөртэнь үхэрхэһэн зондо уур сухалтайгаар, зүгөөр тэрэнэй үршөөл хайрада байһан танда үршөөл хайратайгаар хандадаг. Тэрэнэй үршөөл хайрадань оршоогүй хаатнай, таанадыг баһал таһалжа хаяха. ²³ Харин үнөөхи этигэл хүзэггүй еврейнүүд хубилбал, дахин хууриндаа байрлуулагдаха. Бурхан тэдэниг бусаажа хууриндань байрлуулха арга хүсэтэй юм. ²⁴ Бусад арадууд таанад зэрлиг оливай халаа набшаһадта адлит. Хэрбээ өөһэдынгөө зэрлиг модонһоо таһалагдаад, ондоо таримал оливай модондо хуурижуулагдадаг байхадань, таримал модондой халаада адли еврейнүүдыг түрэл хууриндань хуулгахада Бурханда бүришье амархан бэшэ гү?

Бүхы зондо үзүүлэн Бурханай үршөөл

²⁵ Аха дүүнэр, өөһэдынгөө сэсэн ухаатайбди гэжэ бодожо байхагүйнтнай тула энэ нюуса үнэниг таанадта мэдүүлхэ ханаатайб. Израилиин зарим хүн зон ходоодоо тиимэ зүрюу байхагүй, тэдэнэр шэлэгдэхэн бусад арадуудай бүрин Бурханда ерэтэр лэ тиимэ байха. ²⁶ Тиигэжэ Израилиин бүхы арад зон абарагдаха.

«Сион хадаһаа Абарагша ерэхэ,

Яковай үри хадаһадһаа нүгэл шэбэлыг зайсуулха.

²⁷ *Тэдэнэй нүгэл шэбэлыг зайсуулаад,*

Би тэдэнтэй энэ хэлсээ баталхаб», — гэжэ Хангин Бэшэг соо

бэшээтэй байдаг.

²⁸ Бусад арадууд таанадай аша туһада Һайн Мэдээсэлые буруушааһан еврейнүүд Бурханай дайсадынь болоо. Харин Бурханай шэлэжэ абаһанай, үбгэ эсэгэнэртэнь үгэһэн найдуулгын ашаар тэдэнэр Бурханай нүхэдынь юм. ²⁹ Ушарынь юуб гэбэл, Бурхан шэлэжэ абаһан, буян хэшэгтээ хүртөөһэн хүнүүд тухайгаа һаналаа хубилгадаггүй. ³⁰ Бусад арад таанадай урдань Бурханай үгэ дууладаггүй байһан-тайтнайл адляар мүнөө еврейнүүд баһа Бурханай үгэ дууладаггүй. Тэрээнһэнь боложо таанад Бурханай үршөөл хайрада хүртэбэт. ³¹ Тон тиигэжэл танай хүртэһэн үршөөл хайрада хүртэхын тула еврейнүүд Бурханай үгэ дууланагүй. ³² Үршөөл хайраяа бултанда харуулхын тула Бурхан бүхы хүнүүдые үсэд зүрюю ябадалайнь түлөө баряад байгаа.

³³ Хэн Бурханай баян бардамые, сэсэн ухааниие, мэдэрэл ойлгосые хэмжэжэ барахаб? Хэн тэрэнэй шиидхэбэри шүүбэриие тайлбарилжа шадахаб? Хэн тэрэнэй харгы замые ойлгохоб?

³⁴ *Бурханай һанал бодолнуудые мэдэжэ байһан, али тэрээндэ зүблэл үгэжэ байһан хүн олдохо аал?*

³⁵ *Бусаажэ үгэхэ уялгатайгаар Дээдын Эзэндэ юумэ зээлидэһэн хүн байха аал?*

³⁶ Бүхы юумые тэрэ бүтээһэн байна, бүхы юумэн тэрэнэй ашаар ба тэрэнэй тулада оршоно ха юм. Бурхан хэтын хэтэдэ алдар солотой байһай! Болтогой.

Бурханда алба хэжэ ажаһууха тухай

12 ¹ Зай, аха дүүнэрни, Бурханай үршөөл хайраар өөһэдыгөө арюун сэбэр, таатай, амиды үргэл болгон Бурханда асарагты гэжэ гуйжа байнаб. Тиигэбэл тэрэтнай танай бодото алба болохо. ² Энэ дэлхэйн зондо адли бү байгты, харин ухаан бодолоо шэнэлүүлэн, өөһэдыгөө бүрин хубилгагты. Тиигэбэл таанад Бурханай эрхэ мэдэлые: тэрээндэ һайн һайхан, таатай, эрхим түгэс байхые мэдэжэ байхат.

³ Бурханай намда үршөөһэн абьяас бэлэгэй ашаар таанадай хүн бүхэндэ хэлэнэб: байһанһаан үлүү ехээр өөр тухайгаа бү һанажа байгты. Зүгөөр Бурханай шамда үгэһэн этигэл һүзэгэй хэмжээгээр өөр тухайгаа дарууханаар бодомжолжо байгты. ⁴ Манай ганса бээдэ олон эрхэтэнүүд байна ха юм, тиин бэсын эрхэтэн бүхэн ондо ондоо зорилготой гээшэ. ⁵ Тон тиигэжэл бидэ олоншые байһан мүртөө бултадаа Христостой хамта нэгэ бэе болонобди, тиин бидэ нэгэ

бэсын ондо ондоо эрхэтэнүүдтэл адли бэе бэетэйгээ холбоотойбди. ⁶Тиимэхээ Бурханай маанадта хайрлахан элдэб янзын абьяас бэлигүүдээ хэрэглэнэбди. Хэрбээ Бурханай хэлэһые дамжуулха абьяас бэлигтэй байгаа хаа, этигэл хүзэгэйнгөө хэмжээгээр лэ хүргэхэ ёһотойбди. ⁷Бусад зондо алба хэхэ табилантай хаа, алба хэхэ ёһотойбди; хургаха табилантай хаа, хургаха ёһотойбди; ⁸бусадые урмашуулха табилантай хаа, урмашуулха ёһотойбди. Бусадтай хубаалсажа байгаа хаа, бардам баянаар хубаалсажа бай; хүтэлэгшэ юм хаа, бүхы хүсэ шадалаараа захиржа бай; буян хэгшэ юм хаа, баяртайгаар буян хэжэ бай.

⁹Хүнүүдтэ үнэн зүрхэнһөө дуратай байгты; нүгэлтэ юумэнүүдһээ зайсажа байгты; хайн хайхан юумэндэ эрмэлзэжэ байгты. ¹⁰Бэе бээдээ аха дүүнэртэйл адляар дуратай байгты, бусад зониие өөрһөөн дээгүүр хүндэлэгты. ¹¹Дээдын Эзэндэ урматайгаар, оролдосотойгоор алба хэжэ байгты. ¹²Найдалаараа урмашажа, зоболон бэрхэшээлнүүдтэ тэсэбэритэй байжа, саг үргэлжэ зальбаржа байгты. ¹³Дуталдажа байһан хүзэглэгшэдтэй хубаалсажа, аяншадые гэртээ оруулан хүндэлжэ байгты.

¹⁴Таанадые хашан мүрдэжэ байһан хүнүүдые үрээжэ, хараалгүйгөөр үрээжэ байгты. ¹⁵Баяр жаргалтай байһан зонтой баярлажа, уйлажа гашуудажа байһан зонтой гашуудажа байгты. ¹⁶Хоорондоо нэгэ һанал бодолтой байгты. Омогорхон бахархангүй, юрын хүнүүдтэй нүхэсэжэ байгты. Өөһэд тухайгаа сэсэн ухаантайбди гэжэ бү бодогты.

¹⁷Таанадта муу юумэ хэхэн хүндэ харюудань муу юумэ бү хэгты. Харин хүн бүхэнэй хайн гэжэ бододог юумэ бүтээхээ оролдогты. ¹⁸Хүн бүхэнтэй эбтэй эетэй байхын тула бүхы шадалаараа шармайжа байгты. ¹⁹Аха дүүнэр, үһөөгөө абаха гэжэ бү забдагты, харин Бурханай уур сухалда тэрэнээ даалгагты. «Би үһөөгөө абахаб, би харюулхаб гэжэ Дээдын Эзэн хэлэнэ», – гээд Нангин Бэшэгтэ бэшээтэй байдаг ха юм. ²⁰«Хэрбээ дайсаншни үлэсэжэ байбал, тэрэндээ эдэе хоол үгэ; хэрбээ ангажа байбал, тэрэнээ ундалуула. Тиигэбэлшни тэрэ эшэһэндээ газар доро орон алдахал», – гэжэ Нангин Бэшэг соо баһа хэлэгдэнэ. ²¹Харатай муу юумэн шамайе бү илаг, харин орондонь ши харатай муу юумые хайн хайхан юумээр илажа бай.

Засаг захиргаанай урда дүүргэхэ уялганууд тухай

13 ¹ Хүн бүхэн засаг баригшатай үгэ дуулажа байха ёһотой, ушарынъ юуб гэбэл, ганса Бурханай зүбшөөлөөр лэ хүндэ засаг бариха эрхэ үгтэдэг юм, тиин мүнөөнэй засаг баригшадые Бурхан лэ табиһан болоно. ² Засаг захиргаанай урдаһаа эсэргүүсэһэн хүн Бурханай тогтоолдо эсэргүүсэнэ, тиимэһээ тэрэ хэһээлтэдэ орохо. ³ Засаг захиргаан хайн юумэ бүтээжэ байһан зондо бэшэ, харин харата муухай юумэ үйлэдэжэ байһан зондо аймшагтай байдаг. Засаг захиргаанһаа айхын хэрэггүй: хайн юумэл бүтээжэ байгаарай, тигэбэл засаг захиргаанай магтаалда хүртэхэш. ⁴ Тэдэнэршни шинии хайн хайханай түлөө ажаллажа байһан Бурханай зарасанар ха юм. Хэрбээ харата муухай юумэ үйлэдэжэ байбал, тэдээнһээ айжа бай, тэдэшни хэһээхээр бодото хүсэ шадалтай юм. Тэдэ засаг баригшадшни харата муухай юумэ үйлэдэжэ байһан зониие хэһээлдэг Бурханай зарасанар юм. ⁵ Тиимэһээл ши гансал хэһээлтэһээ айгаад бэшэ, харин зүб юумэ хэнэб гэжэ һэшхэлээрээ ойлгон засаг баригшатай мэдэлдэ байха ёһотойш.

⁶ Засаг баригшад Бурханай ажал хэхэ уялгатай, тиимэһээл таанад тэдэндэ татабари түлэнэт. ⁷ Үгэхэ ёһотой юумэээ бүхы хүнүүдтэ үгэжэ байгты: татабари үгэхэ ёһотой болбол, татабарая үгэгты; алба түлэхэ ёһотой болбол, албаяа түлэгты; хүрдэхэ ёһотой болбол, хүрдэжэ байгты; хүндэлэл үзүүлхэ ёһотой болбол, хүндэлэл үзүүлжэ байгты.

Хайра дуран тухай

⁸ Хэндэшье үритэй байха ёһогүйт, зүгөөр бэе бээдээ дуратай байһантнай гансал үри шэритнай байха ёһотой. Ондoo хүндэ дуратай байхадаа хүн Хуулиин зүйлнүүдые гүйсэдхэбэ гээшэ. ⁹ «Эрэдээ гү, али эхэнэртээ бү урба; бү ала; бү хулгайла; хүнэй юумэндэ бү һаһаарха» гэһэн захяа заабаринууд болон бусадшье олон заабаринууд «Дүтынгөө хүндэ өөртөөл адли дуратай бай» гэһэн гансал захяа заабари соо тобшологдоно ха юм. ¹⁰ Хэрбээ таанад бусад зондо дуратай байбал, тэдэ зондоо хэзээшье муу юумэ хэхэгүйт. Хайра дуратай байхань Хуулиин зүйлнүүдые гүйсэдхэхэтэй адли юм.

¹¹ Ямар сагай ерээд байһые таанад мэдэнэ ха юмта: нойрһоо һэрихэ сагтнай болоо, анхан этигэһэн хаһада ороходоо абарагдаха сагтнай бүри ойртоо. ¹² Һүни үнгэрөөд, үдэр болохонь ойртобо. Харанхы мунхагта хабаатай юумэнүүдые хэхээ болёод, зэр зэбсэг

баряад гэрэл туяа соо тулалдахаяа бэлэн байял! ¹³ Үдэрэй гэрэл туяада ажамидаржа байһан зондо зохихоор өөһэдыгөө абажа ябаял: забхай найр наада хэнгүй, архидангүй, ташаяаралдангүй, зальхайралдангүй, хэрүүл ама гаргангүй, атаархалдангүй байжа үзээл. ¹⁴ Харин Дээдын Эзэн Иисус Христосые хуяг дуулгадад адли үмдээл, нүгэлтэ мүн шанар байдалаа анхархаяа, хүсэлэнгүүдыень хангахаяа болиёл.

Ондоо хүнүүдые бү шүүбэрилэ

14 ¹Этигэл хүзэгөөр һула хүнүүдые хүндэлжэ байгты, һанал бодол тухайнь тэдэнтэй бү арсалдагты. ²Зарим хүнүүдэй этигэл хүзэгынь ямаршые юумэ эдихые зүбшөөдэг, харин этигэл хүзэгөөр һула хүнүүд гансал ургамал эдидэг. ³Ямаршые юумэ эдидэг хүн нүгөөдэ эдидэггүй хүнөө доогуур бү хараг; тиин гансал ургамал эдидэг хүн үнөөхи ямаршые юумэ эдидэг хүнөө бү шүүбэрилэг, Бурхан тэрэ хүниие һайшаагаад байна ха юм. ⁴Ондоо хүнэй зарасые шүүбэрилжэ байхаар ши хэн гээшэбши? Тэрэ хүнэйшни эзэниинь лэ зарасынгаа зүб гү, али буруу байһыень мэдэхэ юм. Тэрэ зүб байха, юундэб гэбэл, Дээдын Эзэн тэрэниие зүб байлгаха арга хүсэтэй юм.

⁵Зарим хүнүүд нэгэ үдэрые бусад үдэрнүүдтэ ороходоо шухала гэжэ тоолоод, тусгайгаар тэмдэглэдэг, тиихэдэнь нүгөө зарим хүнүүд үдэрнүүдые хоорондонь илгадаггүй. Хүн бүхэмнай хэжэ бодожо байһанайнгаа ушар шалтагынь ойлгожо байг. ⁶Нэгэ үдэрые бусад үдэрнүүдтэ ороходоо шухала тусхай гэжэ тоолодог хүн Дээдын Эзэнэй алдартат тиигэнэ. Ямаршые юумэ эдидэг хүн Дээдын Эзэнэй алдартат эдинэ, тэрэ эдээ хоолойнгоо түлөө Бурханда баяр баясхалан хүргэнэ ха юм. Зарим юумэнүүдые эдидэггүй хүн Дээдын Эзэнэй алдартат эдинэгүй, тэрэ хүн Бурханда баяр баясхалан хүргэдэг юм. ⁷Бидэ ганса бээе бодон ажамидардаггүйбди, али ганса бээе бодон үхэдэггүйбди. ⁸Ажамидархадаа бидэ Дээдын Эзэниие бодон ажамидарнабди, үхэхэдөө бидэ Дээдын Эзэниие бодон үхэнэбди. Тиимэхээ амидарна гүбди, али үхэнэ гүбди, бидэ Дээдын Эзэнэйл хүмди. ⁹Амиды ба үхэхэн хүнүүдэй Дээдын Эзэн байхын тула Христос үхөөд амидырһан байгаа. ¹⁰Тиихэдээ ши юундэ хүзэглэгшэ аха дүүгээ шүүбэрилээ хүмши? Али яахадаа ши хүзэглэгшэ аха дүүгээ доогуур хараа хүмши? Бидэ бултадаал Бурханай зарга шүүбэридэ орохо ха юмбди.

¹¹ *«Яһатан бүхэн урдамни мургэхэ,
ямаршые хэлэтэй хүн намайе Бурхан гэжэ айлдахаха,*

ами наһаараа тангаригланаб гэжэ

Дээдын Эзэн хэлэнэ», – гэжэ Нангин Бэшиг соо хэлээтэй байдаг.

¹² Хүн бүхэмнай өөрынгөө үйлэ ябадалай түлөө Бурханай урда тоосохо юм.

Бусад зоние бү доройтуула

¹³ Зай, бэе бээ шүүбэрилхэ шүүмжэлхээ болиёл даа. Харин бусад зоние бүдэрүүлхэ гү, али нүгэл шэбэлдэ унагааха юумэ хэхэгүй гэжэ оролдожо байял. ¹⁴ Ямаршые эдэе хоол эдижэ болохо гэжэ Дээдын Эзэн Иисус намда бата этигэл үгөө. Хэрбээ таанад зарим эдихэ юумээ бузартай гэжэ тоолоо хаа, тэрэ эдеэнтнай танда бузартай байха. ¹⁵ Хэрбээ эдижэ байһан юумээрээ ши ондоо хүниие гомдохооболшни, ши хайра дураар хүтэлүүлэгдэнэгүйш. Эдижэ байһан хоолоороо ши тэрэ хүниие доройтуулан бү хосороо. Тэрэ хүнэйшни түлөө Христос өөрынгөө амиие үгөө ха юм. ¹⁶ Шинии һайн гэжэ бодожо байһан юумэнүүдые хүнүүд бү шүүбэрилэг. ¹⁷ Ушарынь юуб гэбэл, Бурханай хаан орон эдихэ, уха тухай бэшэ, харин Нангин Һүлдэһөө эхи абадаг үнэн сэдхэл, энхэ тайбан, баяр жаргал тухай юм. ¹⁸ Таанад тиимэ маягаар Христосто алба хэжэ байбал, Бурханда таатай ба хүн зондо хүндэтэй байхат.

¹⁹ Тиимэһээл бидэ энхэ тайбаниие найруулдаг, бэе бэеынгээ этигэл хүзэг бэхижүүлдэг юумэнүүдтэ зорижо байха ёһотойбди. ²⁰ Эдэе хоолһоо боложо Бурханай хэһэн юумэ бү һандарга. Ямаршые эдэе хоол эдижэ болохо юм, гэхэтэй сасуу ондоо хүниие нүгэл шэбэлдэ унагааха шалтаг болохо юумэ эдихэнь буруу юм. ²¹ Бусад хүзэглэгшэдые доройтон унагааха шалтаг болохо ямаршые юумэ хэнгүй, мяха эдингүй, архи уунгүй байхань зүб юм. ²² Эдэ мэтэ этигэжэ бодожо байһан юумэнүүдээ зосоогоо баряад, Бурхандаал мэдүүлээд бай. Эдихэн ууһан юумээрээ һэшхэлдээ гэмнүүлээгүй хүн жаргалтай байна! ²³ Харин эдижэ байһан юумэн тухайгаа һэжэглэһэн хүниие Бурхан тэрэ юумээ эдижэ байхадань гэмнэдэг, юундэб гэбэл, тэрэ хүн этигэл хүзэгэйнгөө ёһоор болоногүй ха юм. Тиин этигэл хүзэгэй ёһоор хэгдэдэггүй юумэнүүд булта нүгэлтэй юм.

Ганса бэе тухайгаа бү бодогты, бусадта аша тухатай байгты

15 ¹ Бата этигэл хүзэгтэй бидэнэр ганса бээ бодохо ёһогүйбди, харин этигэл хүзэгөөр бирагүйхэн зоние дэмжэхэ ёһотойбди.

² Бусад хүзэглэгшэдэй эрхим һайн байхын түлөө, этигэл хүзэгын

бата бэхи болгохын тула бидэ булта гэдэндэ аша тухатай юумэ хэхэ ёһотойбди. ³ Юундэб гэбэл, Христосшые ганса бэеэ бодожо байгаагүй юм. Харин: «Шамаые доромжолһон баһалтанууд нам дээрэ буугаа», – гэжэ Нангин Бэшэг соо бэшэгдэһэнэй ёһоор болоо юм. ⁴ Нангин Бэшэг соо хэлээтэй бүхы юумэнүүд маанадта найдал үгэхэ зуураа һургаха, тэсэбэритэй болгохо, урмашуулха зорилготойгоор бэшээтэй байгаа. ⁵ Маанадые тэсэбэритэй байлдаг, урмашуулдаг Бурхан Христос Иисусай жэшээгээр таанадые нэгэ һанал бодолтой байлгадай. ⁶ Тиигэбэл таанад бултадаа нэгэ дуугаар Бурханда, манай Дээдын Эзэн Иисус Христосой Эсэгэдэ алдар соло дуудахат.

Һайн Мэдээсэл еврейнүүдтэ болон бусад арадуудта үгөөтэй юм

⁷ Христосой таанадые хүндэлдэг байһандал адляар таанадшые бэеэ хүндэлжэ, Бурханда магтаал соло дуудажа байгты. ⁸ Бурханай үбгэ эсэгэнэртэ үгэһэн найдуулгын бүтэһые харуулан, Христос еврейнүүдэй зарасань болон ерээ гэжэ би хэлэнэб. ⁹ Баһа бусад арадуудай үршөөл хайрынь түлөө Бурханда магтаал соло дуудажа байхын тула Христос ерээ юм.

«Бусад арадуудай дунда

би шам тухай айладхажэ байхаб,

шини нэрэ алдартэ

би магтаалнуудые дуулажэ байхаб», – гэжэ Нангин Бэшэг соо бэшээтэй байдаг.

¹⁰ «Бусад яһатад, Бурханай арадтай хамта баярлагты», – гэжэ баһа бэшээтэй байдаг.

¹¹ *«Бусад яһатад, бултадаа*

Дээдын Эзэндэ магтаал соло дуудагты,

бүхы арад, тэрээниие алдаршуулагты!» – гэжэ баһа

бэшээтэй байдаг.

¹² *«Иессэй үри һадаһан бии болохо,*

тэрэ бусад арадые захирхая ерэхэ,

харин тэдэнэрынь тэрээндэ найдажэ байха», – гэжэ баһа Исаяя хэлэнэ.

¹³ Найдал үршөөдэг Бурхан этигэл хүзэгэйтнай ашаар таанадые бүтэн баяр жаргалаар ба амгалан байдалаар дүүргэг лэ, тиигэжэ Нангин Һүлдын хүсөөр этигэл найдалтнай нэмэгдэжэ байг лэ.

Павелай сэхыень бэшэһэнэй шалтагаан

¹⁴ Аха дүүнэрни, таанад эрхим хайнта, элдэб янзын эрдэм мэдэрэлтэйт, бэе бээе хургаха аргатайт гэжэ би хатуу этигэлтэй байнаб. ¹⁵ Энэ бэшэг соогоо зарим юумэнүүдые хануулхадаа би сэхыень хэлээб. Бурханай үршөөл хайраар би ¹⁶ бусад арадуудай аша туһада Христос Иисусай зараса болооб. Бусад арадые Нангин Хүлдын ашаар Бурханда таатай арюун нангин үргэл болгохын тула би Бурханай Хайн Мэдээсэлые номнон, санаартанай ажал ябуулнаб. ¹⁷ Иисус Христосой ашаар Бурханда алба хэжэ байһанаараа би бахархаха аргатайб. ¹⁸⁻¹⁹ Бусад арадуудые Бурханай мэдэлдэ оруулхын тула Христос гайхамшагта тэмдэгүүдээр ба үйлэ хэрэгүүдээр, Бурханай Хүлдын хүсэ шадалаар намаар юу хэлүүлээ, хүүлээ һэм, тэрээн лэ тухай би хөөрэхээ зүрхэлхэб. Аяншалжа ябахандаа би Иерусалимһаа Иллирик хүрэтэр хаа хаанагүй Христос тухай Хайн Мэдээсэл номножо байгааб. ²⁰ Тиихэдээ би ондоо хүнэй татаһан һуури дээрэ барихагүйн тула Христос тухай хүнүүдэй огто дуулаагүй газар дайдаар номнохо гэжэ оролдожо байгааб. ²¹ Нангин Бэшэгэй хэлэһэн ёһоор:

*«Тэрээн тухай мэдээсэлгүй байһан хүнүүд хараха,
Тэрээн тухай юумэ дуулаагүй хүнүүд ойлгохо».*

Павелай Рим хото ошохо түлэблэлгэ

²² Таанадта оло дахин ошохо гэхэдэмни, энэ ажални намайе табидаггүй байгаа. ²³ Харин мүнөө эдэ нютагуудта ажалаа дүүргэһэн, олон жэлэй туршада таанадтай ошожо уулзаха ханаатай байһан юм хадаа ²⁴ Испани ошохо замдаа таанадые дайрахаб. Тиигээд нэгэ хэды саг соо таанадтайгаа уулзажа баярлахаб, һүүлдэнь замаа үргэлжэлүүлэхэдэмни туһалхат гэжэ найданаб. ²⁵⁻²⁶ Харин мүнөө би Македониин ба Ахайяын хүзэглэгшэдэй хайн дураараа суглуулһан алта мүнгэ дуталдажа байһан Бурханай хүнүүдтэ хубаажа үгэхөөр Иерусалим хото ошоноб. ²⁷ Тэдэ хүзэглэгшэд туһалха гэхэн шийдхэбэри өөһэдөө гаргаа. Гэхэтэй зэргэ үнэн бодолоороо тэдэнэр туһалха ёһотойшые юм. Хэрбээ еврейнүүд оюун сэдхэлэй буян хэшэгээрээ бусад арадуудтай хубаалдаһан байбал, бусад арадуудшые алта мүнгэнэй буян хэшэгээрээ еврейнүүдтэ туһалха ёһотой юм. ²⁸ Тэдэндэ суглуулагдаһан алта мүнгэ хүргэхэ ажалаа бүтээгээд, би таанадаа дайран Испани руу ябахаб. ²⁹ Таанадта ерэхэдээ би Христосой буян хэшэгээр таанадтай элбэг дэлбэгээр хубаалсахаб гэжэ мэдэнэб.

³⁰ Аха дүүнэр, намтай хамта минии түлөө Бурханда ханалгатайгаар зальбаржа байгыт даа гэжэ гуйнаб. Бидэ манай Дээдын Эзэн Иисус Христосто нэгэ адли этигэл хүзэгтэй, Хүлдын үршөөдэг нэгэ адли хайра дуратай ха юмбиди. ³¹ Иудейн хүзэггүй зонһоо Бурхан намайе аршалһай, Иерусалимда хэхэ ажални тэндэхи Бурханай зондо найшаагдаһай гэжэ зальбарыг даа. ³² Тиигэбэл би, Бурханай хүсөөһаа, таанадта баяр жаргалтай ерэхэб, таанадтайгаа уулзаад ханаагаа амархаб. ³³ Амгалан байдал үршөөдэг Бурхан та бүхэнтэй оршожо байхань болтогой!

Хүнүүдые амаршална

16 ¹ Кенхрейын хүзэглэгшэдэй бүлгэмдэ хүдэлдэг Фойбэ эгэшэтэй таанадые танилсуулхамни. ² Тэрэниие Бурханай хүнүүдтэ зохихо ёһоор Дээдын Эзэнэй нэрээр угтажа абаарайгты, хэрэгүүдтэнь өөһэдынгөө зүгһөө шадалаараа хамһалсажа байгаарайгты. Тэрэ эхэнэр намдашье, бусадшье олон зондо ехэ туһа хүргөө юм. ³ Акила Прискилла хоёрто намһаа мэндэ дамжуулаарайгты. Тэдэнэр намтай хамта Христос Иисуста гансашье алба хэжэ байгаа бэшэ, ⁴ харин минии түлөө ами наһанай аюул оһолдошье орожо байгаа. Гансашье би бэшэ, харин еврей-бэшэ хүзэглэгшэдэй бүлгэмүүд бултадаа тэдэндэ баяр баясхалан хүргэжэ байна. ⁵ Тэдэнэй гэртэ суглардаг хүзэглэгшэдэй бүлгэмдэ амар мэндэ хүргөөрэйгты.

Аси можын Христосто хүзэглэгшэдэй түрүүшын хүниинь байһан инаг хайрата Эпанэт нүхэртэмни мэндэ дамжуулаарайгты. ⁶ Таанадай аша туһада аргагүй ехээр хүдэлжэ байһан Марияда амар мэндэ хүргөөрэйгты. ⁷ Намтай хамта түрмэдэ һууһан манай яһанай Андроник Юния хоёрто мэндэ дамжуулаарайгты. Тэдэ хоёр элшэнэрэй дунда мэдээжэ, намһаа урда Христосто хүзэглэһэн түүхэтэй юм.

⁸ Дээдын Эзэнээр намда ехэл хайра дуратай байдаг Амплиатда мэндэ дамжуулаарайгты. ⁹ Маанадаар хамта Христосто алба хэдэг Урбанда, минии инаг хайратай Стахида амар мэндэ хүргөөрэйгты. ¹⁰ Туршалгануудые дабахадаа Христосто үнэн сэхэ байһанаа баталһан Апеллестэ мэндэ дамжуулаарайгты. Аристубулай гэр бүлэдэ амар мэндэ хэлээрэйгты. ¹¹ Минии яһанай Иродиондо, Христосто хүзэглэдэг Наркисай гэр бүлынхидтэ амар мэндэ хүргөөрэйгты.

¹² Дээдын Эзэндэ алба хэжэ байһан Трюфана Трюфоса хоёрто, Дээдын Эзэнэй аша туһада аргагүй ехэ ажал бүтээһэн инаг хайрата Персидэдэ мэндэ дамжуулаарайгты. ¹³ Дээдын Эзэнэй шэлэжэ

абahan Рифта, намда хүбүүндээл адли хандадаг тэрэнэй эжидэ мэндыемни дамжуулаарайгты. ¹⁴ Асинкрит, Флегонт, Ерма, Патроб, Ерма болон тэдэнтэй байһан бусад хүзэглэгшэ аха дүүнэртэ мэндыемни дамжуулаарайт. ¹⁵ Филолог Юлия хоёрто, Нерейдэ, тэрэнэй дүү басаганда, Олимпда, тэдэнтэй хамта байһан Бурханай бүхы хүнүүдтэ мэндыемни дамжуулаарайгты.

¹⁶ Бэе бэеэ таалажа амаршалаарайгты. Христосой хүзэглэгшэдэй бүхы бүлгэмүүд таанадта мэндэээ дамжуулжа байна.

Түгэсхэлэй захибари

¹⁷ Аха дүүнэр, таанадай һуража абahan бүхы юумые буруушаан, бэрхэшээл зоболон тулгаруулдаг, хүзэглэгшэдэй бүлгэмые хоорондонь хубаадаг хүнүүдһээ болгоомжолжо байгты гэжэ гуйнаб. Таанад тиимэ зонһоо зайсажа байгты. ¹⁸ Тэдэ зон тиимэ юумэ хэхэдээ, манай Дээдын Эзэн Христосто бэшэ, харин өөрынгөө гэдэһэ ходоодо алба хэнэ гээшэ. Тэдэнэр уран гоё үгэ хүүрээрээ гэнэн гэдэргэ зонииел зангадаа оруулдаг юм. ¹⁹ Дээдын Эзэнэй мэдэлдэ бүрин байдагыетнай хүн бүхэн мэдэхэ, тиимэһээ би таанадай түлөө баярлажа байдаг хүнби. Һайн һайхан юумые ойлгожо байгаад, нүгэлтэ муухай юумэнһээ зайсажа байһайт гэжэ хүсэнэб. ²⁰ Маанадта амгалан байдал үршөөдэг Бурхан удангүй сатанае танай ула доро оруулан хүнөөхэ.

Манай Дээдын Эзэн Иисусай үршөөл хайра таанадтай оршожо байхань болтогой!

²¹ Намтай хамта хүдэлдэг Тимофей, баһа манай яһатанай хамаатан Луций, Иасон, Сосипатр гэгшэд таанадта мэндые дамжуулна.

²² Энэ бэшэгые саарһан дээрэ буулгаһан хүзэглэгшэ Тертый би баһа таанадта амар мэндые дамжуулнаб.

²³ Гэртээ намайе айлшалуулжа байһан, хүзэглэгшэдэй бүлгэмые суглуулжа байһан Гай таанадта мэндые дамжуулна. Хотын мүнгэнэй һан эрхилэгшэ Эраст, Кварт дүүмнай таанадта баһа мэндые дамжуулна. ²⁴ Манай Дээдын Эзэн Иисус Христосой үршөөл хайрата бүхэнтэй оршожо байһай!

Түгэсхэлэй зальбаралга

²⁵ Бурханда магтаал соло дуудая! Тэрэ болбол Иисус Христос тухай минии номноһон Һайн Мэдээсэлэй ёһоор танай этигэл хүзэгые бэхижүүлхэ аргатай юм. Урдань тэрэ Һайн Мэдээсэл үни удаан саг

соо далда нюуса байгаа. ²⁶ Харин мүнөө тэрэ үнэн зүбые лүндэн-шэдэй бэшэгүүд нээгээ; бүхы хүнүүдэй хүзэглэжэ, үгыень дуулажа байхын тула мүнхэ Бурхан захиралтаараа бүхы арадуудта тэрэниие мэдүүлээ. ²⁷ Ори ганса, сэсэн мэргэн Бурхан Иисус Христосой ашаар хэтын хэтэдэ алдар солотой байһай! Болтогой!